



রূপসী বাংলা  
জীবনানন্দ দাশ

## মুখবন্ধ

বছর বারো আগের কথা; স্কুলে পড়ি, ক্লাশ এইটে।। নতুন বই হাতে পেয়ে কবিতা পড়া শুরু করেছি, একটা কবিতায় এসে আটকে গেলাম, চৌদ্দ লাইনের কবিতা; কবিতার নামটা অদ্ভুত, কবির নামও শুনি নি আগে কখনো। পুরো কবিতা জুড়ে অসংখ্য নদী, পাখি, গাছ, ফুল আর ফলের নাম; পড়ে মনে হল এ কবি আমাদের গ্রাম ঘুরে ঘুরে কোথায় কী হচ্ছে দেখে দেখে কবিতাটি লিখেছেন। ছোটবেলা থেকে পড়ে আসা কবিতা বা ছড়ার সাথে কোন মিলই নেই। ভাল লাগল না, খারাপও না। শুধু কিছুক্ষণের জন্য একটা ঘোর গ্রাস করেছিলো। সেদিন সেই বালককে কেউ বলে দেয়নি যার একেকটি কাব্যগ্রন্থ নিয়ে পুরো জীবন কাটিয়ে দেয়া যায় আমি সেই কবির কবিতা পড়ছি, পুরো পৃথিবী ধ্বংস হয়ে গেলেও যার কবিতার উপাদান দিয়ে এই বাংলাকে পুনর্বার নির্মাণ করা যাবে আমি সেই কবির কবিতা পড়ছি; “রূপসী বাংলা”র ৬১টি হীরার একটিকে চোখের সামনে নিয়ে বসে আছি। কবিতাটির নাম ছিল “আবার আসিব ফিরে”। কবির নাম জীবনানন্দ দাশ।

‘রূপসী বাংলা’র কবিতাগুলো প্রথম প্রকাশিত হয় ১৯৫৭ সালে; কবির মৃত্যুর তিন বছর পর।। কবির অনুজ অশোকানন্দ দাশের তত্ত্বাবধানে প্রথম প্রকাশিত সে সংস্করণে কবিতার রচনাকাল হিসেবে লেখা ছিল ১৯৩২ সাল। পরবর্তীতে দেবেশ রায়ের সম্পাদনায় ১৯৮৪ সালে কবিতাগুলো আবার এক মলাটে প্রকাশিত হয়; তখন জানা যায় শিরোনামহীন এই ৭৩ টি কবিতা লেখা ৭৬ পৃষ্ঠার রুলটানা খাতায় কবিতাগুলোর রচনাকাল হিসেবে জীবনানন্দ লিখে রেখেছিলেন মার্চ, ১৯৩৪। সেই ৭৩টি কবিতা থেকে ৬১ টি কবিতা বাছাই করে প্রকাশ করা হয়। কাব্যগ্রন্থের নাম ও কবিতার শিরোনাম অশোকানন্দ দাশের দেয়া; প্রতি কবিতার প্রথম পংক্তির প্রথমাংশ’কে কবিতার শিরোনাম হিসেবে বাছাই করা হয়েছিল।

কিছু কিছু কবিতা, কোন কোন কাব্যগ্রন্থ কবিকে অমরতা দেয়; তাঁর জাত চিনিয়ে দেয়। নজরুলের যেমন ‘বিদ্রোহী’, সুকান্তের যেমন ‘ছাড়পত্র’, সুধীনের যেমন ‘শাশ্বতী’, জীবনানন্দের তেমন ‘রূপসী বাংলা’।। কারণ রূপসী বাংলা আসলে কোন কাব্যগ্রন্থ নয়; সব মিলিয়ে একটি সম্পূর্ণ কবিতা, একটি চিত্রকল্প। এ কবিতার কেন্দ্রীয় চরিত্র বাংলার প্রকৃতি; জীবনানন্দের অপূর্ব শব্দচয়নে যা হয়ে উঠেছে ‘গভীর গভীরতর অসুখ’ আক্রান্ত পৃথিবীর গুণ্ণস্বার মতো। মৃত্যু কল্পনার ‘অসম্ভব বেদনার’ সাথে ‘অমোঘ আমোদ’ নিয়ে এ ই-বুকটি অন্তর্জালের অসংখ্য জীবনানন্দ ভক্তকে উৎসর্গ করা হলো।

## নাবিউল আফরোজ

# রূপসী বাংলা

## জীবনানন্দ দাশ

প্রথম অন্তর্জালিক সংস্করণ  
১৭ই চৈত্র ১৪১৬ বঙ্গাব্দ  
৩১শে মার্চ ২০১০ খৃষ্টাব্দ

সংগ্রহ ও সম্পাদনা  
নাবিউল আফরোজ  
[RNABIUL@GMAIL.COM](mailto:RNABIUL@GMAIL.COM)  
[HTTP://SONNET91.BLOGSPOT.COM](http://SONNET91.BLOGSPOT.COM)

অলংকরণ ও প্রচ্ছদ  
সোহেল কাজী  
[SOHELL.KAZI@GMAIL.COM](mailto:SOHELL.KAZI@GMAIL.COM)  
[HTTP://KAZISOHEL.BLOGSPOT.COM](http://KAZISOHEL.BLOGSPOT.COM)

পাঠকের পড়ার সুবিধার্থে সূচীপত্রের পাশাপাশি বুকমার্ক সুবিধা যোগ করা হল। আপনার পিডিএফ রিডারের বাম পাশে লক্ষ করুন বুকমার্ক আই কন আছে। উক্ত আইকনে ক্লিক করলে যেকোন পৃষ্ঠা হতে আপনি সূচীপত্র দেখতে পাবেন।

সতর্কীকরণঃ ই- বইটি সম্পূর্ণ বিনামূল্যে বিতরণের নিমিত্তে নির্মিত। যে কোন ধরনের বানিজ্যিক প্রয়াসকে কঠোর ভাবে বিরুদ্ধসাহিত করা হল।

কপিরাইট © সোহেল কাজী

## সূচীপত্র

<u>পৃষ্ঠা</u>	<u>শিরোনাম</u>	<u>পৃষ্ঠা</u>	<u>শিরোনাম</u>	<u>পৃষ্ঠা</u>	<u>শিরোনাম</u>
০১.	সেই দিন এই মাঠ	২৩.	ভিজে হয়ে আসে মেঘে	৪৫.	এই জল ভালো লাগে
০২.	তোমার যেখানে সাধ	২৪.	খুঁজে তারে মরো মিছে	৪৬.	একদিন পৃথিবীর পথে
০৩.	বাংলার মুখ আমি	২৫.	পাড়াগাঁর দু'পহর	৪৭.	পৃথিবীর পথে আমি
০৪.	যতদিন বেঁচে আছি	২৬.	কখন সোনার রোদ	৪৮.	মানুষের ব্যথা আমি
০৫.	একদিন জলসিড়ি নদীটির	২৭.	এই পৃথিবীতে এক	৪৯.	তুমি কেন বহু দূরে
০৬.	আকাশে সাতটি তারা	২৮.	কত ভোরে- দু'-পহরে	৫০.	আমাদের রুঢ় কথা
০৭.	কোথাও দেখিনি	২৯.	এই ডাঙা ছেড়ে হয়	৫১.	এই পৃথিবীতে আমি
০৮.	হয় পাখি, একদিন	৩০.	এখানে আকাশ নীল	৫২.	বাতাসে ধানের শব্দ
০৯.	জীবন অথবা মৃত্যু	৩১.	কোথাও মঠের কাছে	৫৩.	একদিন এই দেহ
১০.	যেদিন সরিয়া যাব	৩২.	চ'লে যাব শুকনো পাতা ছাওয়া	৫৪.	আজ তারা কই সব ?
১১.	পৃথিবী রয়েছে ব্যস্ত	৩৩.	এখানে ঘুঘুর ডাকে	৫৫.	হৃদয়ে প্রেমের দিন
১২.	ঘুমায়ে পড়িব আমি	৩৪.	শ্মশানের দেশে তুমি	৫৬.	কোনোদিন দেখিব না
১৩.	ঘুমায়ে পড়িব আমি একদিন	৩৫.	তবু তাহা ভুল জানি	৫৭.	ঘাসের ভিতরে সেই
১৪.	যখন মৃত্যুর ঘুমে	৩৬.	সোনার খাঁচার বুক	৫৮.	এই সব ভালো লাগে
১৫.	আবার আসিব ফিরে	৩৭.	কত দিন সন্ধ্যার	৫৯.	সন্ধ্যা হয় - চারিদিকে
১৬.	যদি আমি ঝ'রে যাই	৩৮.	এ- সব কবিতা আমি	৬০.	একদিন কুয়াশার
১৭.	মনে হয় একদিন	৩৯.	কত দিন তুমি আমি	৬১.	ভেবে ভেবে ব্যথা পাব
১৮.	যে শালিখ মরে যায়	৪০.	এখানে প্রাণের স্রোত		=====০০০=====
১৯.	কোথাও চলিয়া যাব	৪১.	একদিন যদি আমি		
২০.	তোমার বুকের থেকে	৪২.	দূর পৃথিবীর গন্ধে		
২১.	গোলপাতা ছাউনির	৪৩.	অশ্বখ বটের পথে		
২২.	অশ্বখে সন্ধ্যার ছাওয়া	৪৪.	ঘাসের বুকের থেকে		

## সেই দিন এই মাঠ

সেই দিন এই মাঠ শুরু হবে নাকো জানি-  
এই নদী নক্ষত্রের তলে  
সেদিনো দেখিবে স্বপ্ন-  
সোনার স্বপ্নের সাধ পৃথিবীতে কবে আর ঝরে!  
আমি চ'লে যাব ব'লে  
চালতামূল কি আর ভিজিবে না শিশিরের জলে  
নরম গন্ধের চেউয়ে ?  
লক্ষ্মীপেঁচা গান গাবে নাকি তার লক্ষ্মীটির তরে ?  
সোনার স্বপ্নের সাধ পৃথিবীতে কবে আর ঝরে!

চারিদিকে শান্ত বাতি- ভিজে গন্ধ- মৃদু কলরব;  
খেয়ানৌকাগুলো এসে লেগেছে চরের খুব কাছে;  
পৃথিবীর এই সব গল্প বেঁচে র'বে চিরকাল ; -  
এশিরিয়া ধুলো আজ - বেবিলন ছাই হয়ে আছে।



## তোমরা যেখানে সাধ

তোমরা যেখানে সাধ চ'লে যাও- আমি এই বাংলার পারে  
র'য়ে যাব ; দেখিব কাঁঠালপাতা ঝরিতেছে ভোরের বাতাসে;  
দেখিব খয়েরি ডানা শালিখের সন্ধ্যায় হিম হয়ে আসে  
ধবল রোমের নিচে তাহার হলুদ ঠ্যাং ঘাসে অন্ধকারে  
নেচে চলে- একবার- দুইবার- তারপর হঠাৎ তাহারে  
বনের হিজল গাছ ডাক দিয়ে নিয়ে যায় হৃদয়ের পাশে;  
দেখিব মেয়েলি হাত সক্রুণ- শাদা শাঁখা ধূসর বাতাসে  
শঙ্খের মতো কাঁদে : সন্ধ্যায় দাঁড়াল সে পুকুরের ধারে,

খইরঙা হাঁসটিরে নিয়ে যাবে যেন কোন কাহিনীর দেশে-  
'পরণ- কথা'র গন্ধ লেগে আছে যেন তার নরম শরীরে,  
কলমীদামের থেকে জন্মেছে সে যেন এই পুকুরের নীড়ে-  
নীরবে পা ধোয় জলে একবার- তারপর দূরে নিরুদ্দেশে  
চ'লে যায় কুয়াশায়, - তবু জানি কোনোদিন পৃথিবীর ভিড়ে  
হরাব না তারে আমি- সে যে আছে আমার এ বাংলার তীরে।



## বাংলার মুখ আমি

বাংলার মুখ আমি দেখিয়াছি, তাই আমি পৃথিবীর রূপ  
খুঁজিতে যাই না আর : অন্ধকারে জেগে উঠে ডুমুরের গাছে  
চেয়ে দেখি ছাতার মতন বড়ো পাতাটির নিচে ব'সে আছে  
ভোরের দয়েলপাখি- চারিদিকে চেয়ে দেখি পল্লবের স্তূপ  
জাম- বট- কাঁঠালের- হিজলের অশথের ক'রে আছে চুপ;  
ফণীমনসার ঝোপে শটিবনে তাহাদের ছায়া পড়িয়াছে!  
মধুকর ডিঙা থেকে না জানি সে কবে চাঁদ চম্পার কাছে  
এমনই হিজল- বট- তমালের নীল ছায়া বাংলার অপরূপ রূপ

দেখেছিল : বেহুলাও একদিন গাঙুড়ের জলে ভেলা নিয়ে-  
কৃষ্ণা দ্বাদশীর জ্যোত্স্না যখন মরিয়া গেছে নদীর চড়ায়-  
সোনালি ধানের পাশে অসংখ্য অশ্বথ বট দেখেছিল, হায়,  
শ্যামার নরম গান শুনেছিল- একদিন অমরায় গিয়ে  
ছিন্ন খঞ্জনার মতো যখন সে নেচেছিল ইন্দ্রের সভায়  
বাংলার নদী মাঠ ভাঁটফুল ঘুঙুরের মতো তার কেঁদেছিল পায়।



## যতদিন বেঁচে আছি

যতদিন বেঁচে আছি আকাশ চলিয়া গেছে কোথায় আকাশে  
অপরাজিতার মতো নীল হয়ে- আরো নীল- আরো নীল হয়ে  
আমি যে দেখিতে চাই; - সে আকাশ পাখনায় নিঙড়ায় লয়ে  
কোথায় ভোরের বক মাছরাঙা উড়ে যায় আশ্বিনের মাসে;  
আমি যে দেখিতে চাই, - আমি যে বসিতে চাই বাংলার ঘাসে;  
পৃথিবীর পথে ঘুরে বহুদিন অনেক বেদনা প্রাণে স'য়ে  
ধানসিড়িটির পথে বাংলার শ্মশানের দিকে যাব ব'য়ে,  
যেইখানে এলোচুলে রামপ্রসাদের সেই শ্যামা আজো আসে,

যেইখানে কঙ্কাপেড়ে শাড়ি প'রে কোন এক সুন্দরীর শব  
চন্দন চিতায় চড়ে- আমার শাখায় শুক ভুলে যায় কথা;  
যেইখানে সবচেয়ে বেশি রূপ- সবচেয়ে গাঢ় বিষণ্ণতা;  
যেখানে শুকায় পদ্ম- বহু দিন বিশালাক্ষী যেখানে নীরব;  
যেইখানে একদিন শঙ্খমালা চন্দ্রমালা মানিককুমার  
কাঁকন বাজিত, আহা, কোনোদিন বাজিবে কি আর !



## একদিন জলসিড়ি নদীটির

একদিন জলসিড়ি নদীটির পারে এই বাংলার মাঠে  
বিশীর্ণ বটের নিচে শুয়ে রবো; পশমের মতো লাল ফল  
ঝরিবে বিজন ঘাসে, - বাঁকা চাঁদ জেগে র'বে- নদীটির জল  
বাঙালি মেয়ের মতো বিশালাক্ষী মন্দিরের ধূসর কপাটে  
আঘাত করিয়া যাবে ভয়ে ভয়ে- তারপর যেই ভাঙা ঘাটে  
রূপসীরা আজ আর আসে নাকো, পাট শুধু পচে অবিরল,  
সেইখানে কলমীর দামে বেঁধে প্রেতিনীর মতন কেবল  
কাঁদিবে সে সারা রাত, - দেখিবে কখন কারা এসে আমকাঠে

সাজায়ে রেখেছে চিতা; বাংলার শ্রাবণের বিস্মিত আকাশ  
চেয়ে র'বে; ভিজে পেঁচা শান্ত স্নিগ্ধ চোখ মেলে কদমের বনে  
শোনাতে লক্ষ্মীর গল্প- ভাসানের গান নদী শোনাতে নির্জনে;  
চারিদিকে বাংলার ধানী শাড়ি- শাদা শাঁখা- বাংলার ঘাস  
আকন্দ বাসকলতা ঘেরা এক নীল মঠ- আপনার মনে  
ভাঙিতেছে ধীরে ধীরে; - চারিদিকে এইসব আশ্চর্য উচ্ছ্বাস-



## আকাশে সাতটি তারা

আকাশে সাতটি তারা যখন উঠেছে ফুটে আমি এই ঘাসে  
বসে থাকি; কামরাঙা- লাল মেঘ যেন মৃত মনিয়ার মতো  
গঙ্গাসাগরের ঢেউয়ে ডুবে গেছে- আসিয়াছে শান্ত অনুগত  
বাংলার নীল সন্ধ্যা- কেশবতী কন্যা যেন এসেছে আকাশে :  
আমার চোখের 'পরে আমার মুখের 'পরে চুল তার ভাসে;  
পৃথিবীর কোনো পথ এ কন্যারে দেখেনিকো- দেখি নাই অত  
অজস্র চুলের চুমা হিজলে কাঁঠালে জামে ঝরে অবিরত,  
জানি নাই এত স্নিগ্ধ গন্ধ ঝরে রূপসীর চুলের বিন্যাসে

পৃথিবীর কোন পথে : নরম ধানের গন্ধ- কলমীর ড্রাগ,  
হাঁসের পালক, শর, পুকুরের জল, চাঁদা সরপুঁটিদের  
মৃদু ড্রাগ, কিশোরীর চাল- ধোয়া ভিজে হাত- শীত হাতখান,  
ব্যথিত গন্ধের ক্লান্ত নীরবতা- এরি মাঝে বাংলার প্রাণ :  
আকাশে সাতটি তারা যখন উঠেছে ফুটে আমি পাই টের।



## কোথাও দেখিনি

কোথাও দেখিনি, আহা, এমন বিজন ঘাস- প্রান্তরের পারে  
নরম বিমর্ষ চোখে চেয়ে আছে- নীল বুকো আছে তাহাদের  
গঙ্গাফড়িংয়ের নীড়, কাঁচপোকা, প্রজাপতি, শ্যামপোকা ঢের,  
হিজলের ক্লান্ত পাতা- বটের অজস্র ফল ঝরে বারেবারে  
তাহাদের শ্যাম বুকো; - পাড়াগাঁর কিশোরেরা যখন কান্তারে  
বেতের নরম ফল, নাটাফল খেতে আসে ধুন্দল বীজের  
খোঁজ করে ঘাসে ঘাসে, - বক তাহা জানে নাকো, পায় নাকো টের  
শালিখ খঞ্জনা তাহা; - লক্ষ লক্ষ ঘাস এই নদীর দু'ধারে

নরম কান্তারে এই পাড়াগাঁর বুকো শুয়ে সে কোন্ দিনের  
কথা ভাবে; তখন এ জলসিড়ি শুকায়নি, মজেনি আকাশ,  
বল্লাল সেনের ঘোড়া- ঘোড়ার কেশর ঘেরা ঘুঙুর জিনের  
শব্দ হ'ত এই পথে- আরো আগে রাজপুত্র কত দিন রাশ  
টেনে টেনে এই পথে- কি যেন খুঁজেছে, আহা, হয়েছে উদাস;  
আজ আর খোঁজাখুঁজি নাই কিছু- নাটাফলে মিটিতেছে আশ-



## হায় পাখি, একদিন

হায় পাখি, একদিন কালীদহে ছিলে না কি- দহের বাতাসে  
আষাঢ়ের দু' - পহরে কলরব করনি কি এই বাংলায়!  
আজ সারাদিন এই বাদলের কোলাহলে মেঘের ছায়ায়  
চাঁদ সদাগর : তার মধুকর ডিঙাটির কথা মনে আসে,  
কালীদহে কবে তারা পড়েছিল একদিন ঝড়ের আকাশে, -  
সেদিনো অসংখ্য পাখি উড়েছিল না কি কালো বাতাসের গায়,  
আজ সারাদিন এই বাদলের জলে ধলেশ্বরীর চড়ায়  
গাঙশালিখের ঝাঁক, মনে হয়, যেন সেই কালীদহে ভাসে :

এইসব পাখিগুলো কিছুতেই আজিকার নয় যেন- নয়-  
এ নদীও ধলেশ্বরী নয় যেন- এ আকাশ নয় আজিকার :  
ফনীমনসার বনে মনসা রয়েছে না কি?- আছে; মনে হয়,  
এই নদী কি কালীদহ নয়? আহা, ঐ ঘাটে এলানো খোঁপার  
সনকার মুখ আমি দেখি না কি ? বিষণ্ণ মলিন ক্লান্ত কি যে  
সত্য সব; - তোমার এ স্বপ্ন সত্য, মনসা বলিয়া গেল নিজে।



## জীবন অথবা মৃত্যু

জীবন অথবা মৃত্যু চোখে র'বে- আর এই বাংলার ঘাস  
র'বে বুক; এই ঘাস : সীতারাম রাজারাম রামনাথ রায়-  
ইহাদের ঘোড়া আজো অন্ধকারে এই ঘাস ভেঙে চ'লে যায়-  
এই ঘাস : এরি নিচে কঙ্কাবতী শঙ্খমালা করিতেছে বাস:  
তাদের দেহের গন্ধ, চাঁপাফুল- মাখা স্নান চুলের বিন্যাস  
ঘাস আজো ঢেকে আছে; যখন হেমন্ত আসে গৌড় বাংলায়  
কার্তিকের অপরাহ্নে হিজলের পাতা শাদা উঠানের গায়  
ঝ'রে পড়ে, পুকুরের ক্লান্ত জল ছেড়ে দিয়ে চ'লে যায় হাঁস,

আমি এ ঘাসের বুক শুয়ে থাকি- শালিখ নিয়েছে নিঙড়ায়ে  
নরম হলুদ পায়ে এই ঘাস; এ সবুজ ঘাসের ভিতরে  
সোঁদা ধুলো শুয়ে আছে- কাঁচের মতন পাখা এ ঘাসের গায়ে  
ভেরেন্ডাফুলের নীল ভোমরারা বুলাতেছে- শাদা স্তন ঝরে  
করবীর : কোন এক কিশোরী এসে ছিঁড়ে নিয়ে চ'লে গেছে ফুল,  
তাই দুধ ঝরিতেছে করবীর ঘাসে ঘাসে : নরম ব্যাকুল।



## যেদিন সরিয়া যাব

যেদিন সরিয়া যাব তোমাদের কাছ থেকে- দূর কুয়াশায়  
চ'লে যাব, সেদিন মরণ এসে অন্ধকারে আমার শরীর  
ভিক্ষা ক'রে লয়ে যাবে; - সেদিন দু'দন্ড এই বাংলার তীর-  
এই নীল বাংলার তীরে শুয়ে একা একা কি ভাবিব, হয়; -  
সেদিন র'বে না কোনো ক্ষোভ মনে- এই সোঁদা ঘাসের ধূলায়  
জীবন যে কাটিয়াছে বাংলায়- চারিদিকে বাঙালির ভিড়  
বহু দিন কীর্তন ভাসান গান রূপকথা যাত্রা পাঁচালীর  
নরম নিবিড় ছন্দে যারা আজো শ্রাবণের জীবন গোঙায়,

আমারে দিয়েছে তৃপ্তি; কোনো দিন রূপহীন প্রবাসের পথে  
বাংলার মুখ ভুলে খাঁচার ভিতরে নষ্ট শূকের মতন  
কাটাইনি কাটা হয়ে গেলে মাঠে মাঠে কত বার কুড়ালাম খড়,  
বার্ধিলাম ঘর এই শ্যামা আর খঞ্জনার দেশ ভালোবেসে,  
ভাসানের গান শুনে কত বার ঘর আর খড় গেল ভেসে  
মাথুরের পালা বেঁধে কত বার ফাঁকা হ'ল খড় আর ঘর।



## পৃথিবী রয়েছে ব্যস্ত

পৃথিবী রয়েছে ব্যস্ত কোন্‌খানে সফলতা শক্তির ভিতর,  
কোন্‌খানে আকাশের গায়ে রুঢ় মনুমেন্ট উঠিতেছে জেগে,  
কোথায় মাস'ল তুলে জাহাজের ভিড় সব লেগে আছে মেঘে,  
জানি নাকো, আমি এই বাংলার পাড়াগাঁয়ে বাধিয়াছি ঘর:  
সন্ধ্যায় যে দাঁড়কাক উড়ে যায় তালবনে- মুখে দুটো খড়  
নিয়ে যায়- সকালে যে নিমপাখি উড়ে আসে কাতর আবেগে  
নীল তেঁতুলের বনে- তেমনি করুণা এক বুকো আছে লেগে;  
বইচির মনে আমি জোনাকির রূপ দেখে হয়েছি কাতর;

কদমের ডালে আমি শুনেছি যে লক্ষ্মীপেঁচা গেয়ে গেছে গান  
নিশুতি জ্যোৎস্না রাতে, - টুপ টুপ টুপ টুপ সারারাত ঝরে  
শুনেছি শিশিরগুলো - ম্লান মুখে গড় এসে করেছে আহ্বান  
ভাঙা সোঁদা ইটগুলো, - তারি বুকো নদী এসে কি কথা মর্মরে;  
কেউ নাই কোনোদিকে- তবু যদি জ্যোৎস্নায় পেতে থাক কান  
শুনিবে বাতাসে শব্দ : 'ঘোড়া চড়ে কই যাও হে রায়রায়ান -'



## ঘুমায়ে পড়িব আমি

ঘুমায়ে পড়িব আমি একদিন তোমাদের নক্ষত্রের রাতে  
শিয়রে বৈশাখ মেঘ- শাদা- শাদা যেন কড়ি- শঙ্খের পাহাড়  
নদীর ওপার থেকে চেয়ে রবে- কোনো এক শঙ্খবালিকার  
ধূসর রূপের কথা মনে হবে- এই আম জামের ছায়াতে  
কবে যেন তারে আমি দেখিয়াছি- কবে যেন রাখিয়াছে হাতে  
তার হাতে- কবে যেন তারপর শ্মশান্ত চিতায় তার হাড়  
ঝরে গেছে, কবে যেন; এ জনমে নয় যেন- এই পাড়াগাঁর  
পথে তবু তিন শো বছর আগে হয়তো বা- আমি তার সাথে

কাটায়েছি; পাঁচশো বছর আগে হয়তো বা – সাতশো বছর  
কেটে গেছে তারপর তোমাদের আম জাম কাঁঠালের দেশে;  
ধান কাটা হয়ে গেলে মাঠে- মাঠে কতোবার কুড়ালাম খড়;  
বাঁধিলাম ঘর এই শ্যামা আর খঞ্জনার দেশ ভালোবেসে,  
ভাসানের গান গুনে কত বার ঘর আর খড় গেল ভেসে  
মাথুরের পালা বেঁধে কত বার ফাঁকা হল খড় আর ঘর।

## ঘুমায়ে পড়িব আমি একদিন

ঘুমায়ে পড়িব আমি একদিন তোমাদের নক্ষত্রের রাতে;  
তখনো যৌবন প্রাণে লেগে আছে হয়তো বা - আমার তরুণ দিন  
তখনো হয়নি শেষ- সেই ভালো - ঘুম আসে- বাংলার তৃণ  
আমার বুকের নিচে চোখ বুজে- বাংলার আমার পাতাতে  
কাঁচপোকা ঘুমায়েছে - আমিও ঘুমায়ে রবো তাহাদের সাথে,  
ঘুমাব প্রাণের সাথে এই মাঠে - এই ঘাসে □ কথাভাষাহীন  
আমার প্রাণের গল্প ধীরে - ধীরে যাবে - অনেক নবীন  
নতুন উৎসব হবে উজানের- জীবনের মধুর আঘাতে

তোমাদের ব্যস্ত মনে; - তবুও, কিশোর, তুমি নখের আঁচড়ে  
যখন এ ঘাস ছিঁড়ে চলে যাবে - যখন মানিকমালা ভোরে  
লাল- লাল বটফল কামরাঙা কুড়াতে আসিবে এই পথে□  
যখন হলুদ বোঁটা শেফালি কোনো এক নরম শরতে  
ঝরিয়ে ঘাসের পরে, - শালিখ খঞ্জনা আজ কতো দূরে ওড়ে□  
কতোখানি রোদ- মেঘ - টের পাবে শুয়ে শুয়ে মরণের ঘোরে।



## যখন মৃত্যুর ঘুমে

যখন মৃত্যুর ঘুমে শুয়ে রবো – অন্ধকারে নক্ষত্রের নিচে  
কাঁঠাল গাছের তলে হয়তো বা ধলেশ্বরী চিলাইয়ের পাশে –  
দিনমানে কোনো মুখ হয়তো সে শ্মশানের কাছে নাহি আসে –  
তবুও কাঁঠাল জাম বাংলার- তাহাদের ছায়া যে পড়িছে  
আমার বুকের পরে – আমার মুখের পরে নীরবে ঝরিছে  
খয়েরী অশখপাতাত – বঁইচি, শেয়ালকাঁটা আমার এ দেহ ভালোবাসে,  
নিবিড় হয়েছে তাই আমার চিতার ছাইয়ে – বাংলার ঘাসে  
গভীর ঘাসের গুচ্ছে রয়েছি ঘুমায়ে আমি, – নক্ষত্র নড়িছে

আকাশের থেকে দূর- আরো দূর- আরো দূর- নির্জন আকাশে  
বাংলার- তারপর অকারণ ঘুমে আমি পড়ে যাই ঢুলে।  
আবার যখন জাগি, আমা শ্মশানচিতা বাংলার ঘাসে  
ভরে আছে, চেয়ে দেখি, - বাসকের গন্ধ পাই- আনারস ফুলে  
ভোমরা উড়িছে, শুনি- গুবরে পোকাকার ক্ষীণ গুমরানি ভাসিছে বাতাসে  
রোদের দুপুর ভরে- শুনি আমি; ইহারা আমার ভালোবাসে-



## আবার আসিব ফিরে

আবার আসিব ফিরে ধানসিড়ির তীরে – এই বাংলায়  
হয়তো মানুষ নয় – হয়তো বা শঙ্খচিল শালিখের বেশে;  
হয়তো ভোরের কাক হয়ে এই কার্তিকের নবান্নের দেশে  
কুয়াশার বুকে ভেসে একদিন আসিব এ কাঠালছায়ায়;  
হয়তো বা হাঁস হব – কিশোরীর – ঘুঙুর রহিবে লাল পায়,  
সারা দিন কেটে যাবে কলমীর গন্ধ ভরা জলে ভেসে- ভেসে;  
আবার আসিব আমি বাংলার নদী মাঠ ক্ষেত ভালোবেসে  
জলাঙ্গীর ঢেউয়ে ভেজা বাংলার এ সবুজ করুণ ডাঙায়;

হয়তো দেখিবে চেয়ে সুদর্শন উড়িতেছে সন্ধ্যার বাতাসে;  
হয়তো শুনিবে এক লক্ষ্মীপেচাঁ ডাকিতেছে শিমুলের ডালে;  
হয়তো খইয়ের ধান ছড়াতেছে শিশু এক উঠানের ঘাসে;  
রূপসার ঘোলা জলে হয়তো কিশোর এক শাদা ছেঁড়া পালে  
ডিঙা বায় – রাঙা মেঘ সাঁতরায়ে অন্ধকারে আসিতেছে নীড়ে  
দেখিবে ধবল বক: আমরাই পাবে তুমি ইহাদের ভিড়ে -



## যদি আমি ঝ'রে যাই

যদি আমি ঝ'রে যাই একদিন কার্তিকের নীল কুয়াশায়  
যখন ঝরিছে ধান বাংলার ক্ষেতে- ক্ষেতে ম্লান চোখ বুজে,  
যখন চড়াই পাখি কাঁঠালীচাপাঁর নীড়ে ঠোঁট আছে গুজে,  
যখন হলুদ পাতা মিশিতেছে খয়েরি পাতায়,  
যখন পুকুরে হাঁস সোঁদা জলে শিশিরের গন্ধ শুধু পায়,  
শামুক গুগলিগুলো পড়ে আছে শ্যাওলার মলিন সবুজে-  
তখন আমারে যদি পাও নাকো লালশাক- ছাওয়া মাঠে খুঁজে,  
ঠেস্ দিয়ে বসে আর থাকি নাকো যদি বুনো চালতার গায়ে,

তাহলে জানিও তুমি আসিয়াছে অন্ধকারে মৃত্যুর আহ্বান-  
যার ডাক শুনে রাঙা রৌদ্রেরও চিল আর শালিখের ভিড়  
একদিন ছেড়ে যাবে আম জাম বনে নীল বাংলার তীর,  
যার ডাক শুনে আজ ক্ষেতে- ক্ষেতে ঝরিতেছে খই আর মৌরির ধান; -  
কবে যে আসিবে মৃত্যু; বাসমতী চালে- ভেজা শাদা হাতখান-  
রাখো বুক, হে কিশোরী, গোরোচনারূপে আমি করিব যে ম্লান-



## মনে হয় একদিন

মনে হয় একদিন আকাশের শুকতারা দেখিব না আর;  
দেখিব না হেলেধরার ঝোপ থেকে এক ঝাড় জোনাকি কখন  
নিভে যায়; দেখিব না আর আমি পরিচিত এই বাঁশবন,  
শুকনো বাঁশের পাতা- ছাওয়া মাটি হয়ে যাবে গভীর আঁধার  
আমার চোখের কাছে; লক্ষ্মীপূর্ণিমার রাতে সে কবে আবার  
পেঁচা ডাকে জ্যোৎস্নায়; হিজলের বাঁকা ডাল করে গুঞ্জরণ;  
সারা রাত কিশোরীর লাল পাড় চাঁদে ভাসে- হাতের কাঁকন  
বেজে ওঠে : বুঝিব না- গঙ্গাজল, নারকোলনাডুগুলো তার

জানি না সে কারে দেবে- জানি না সে চিনি আর শাদা তালশাঁস  
হাতে লয়ে পলাশের দিকে চেয়ে দুয়ারে দাঁড়ায়ে রবে কি না...  
আবার কাহার সাথে ভালোবাসা হবে তার- আমি তা জানি না-  
মৃত্যুরে কে মনে রাখে?- কীর্তিনাশা খুঁড়ে খুঁড়ে চলে বারো মাস  
নতুন ডাঙার দিকে- পিছনের অবিরল মৃত চর বিনা  
দিন তার কেটে যায়- শুকতারা নিভে গেলে কাঁদে কি আকাশ?



## যে শালিখ মরে যায়

যে শালিখ মরে যায় কুয়াশায়- সে তো আর ফিরে নাহি আসে:  
কাঞ্চনমালা যে কবে ঝরে গেছে; - বনে আজো কলমীর ফুল  
ফুটে যায়- সে তবু ফেরে না, হয়; - বিশালান্ম্মী: সেও তো রাতুল  
চরণ মুছিয়া নিয়া চলে গেছে; - মাঝপথে জলের উচ্ছ্বাসে  
বাধা পেয়ে নদীরা মজিয়া গেছে দিকে দিকে- শ্মশানের পাশে  
আর তারা আসে নাকো; সুন্দরীর বনে বাঘ ভিজে জুল- জুল  
চোখ তুলে চেয়ে থাকে- কতো পাটরানীদের গাঢ় এলোচুল  
এই গৌড় বাংলায়- পড়ে আছে তাহার পায়ের তলে ঘাসে

জানে সে কি! দেখে নাকি তারা বনে পড়ে আছে বিচূর্ণ দেউল,  
বিশৃঙ্খ পদ্মের দীঘি- ফোঁপড়া মহলা ঘাট, হাজার মহাল  
মৃত সব রূপসীরা; বুকে আজ ভেরেন্ডার ফুলে ভীমরুল  
গান গায়- পাশ দিয়ে খল্ খল্ খল্ খল্ বয়ে যায় খাল,  
তবু ঘুম ভাঙে নাকো- একবার ঘুমালে কে উঠে আসে আর  
যদিও ডুকরি যায় শঙ্খচিল- মর্মরিয়া মরে গো মাদার।



## কোথাও চলিয়া যাব

কোথাও চলিয়া যাব একদিন; - তারপর রাত্রির আকাশ  
অসংখ্য নক্ষত্র নিয়ে ঘুরে যাবে কতকাল জানিব না আমি;  
জানিব না কতকাল উঠানে ঝরিবে এই হলুদ বাদামী  
পাতাগুলো- মাদারের ডুমুরের- সোঁদা গন্ধ- বাংলার শ্বাস  
বুকে নিয়ে তাহাদের; - জানিব না পরথুপী মধুকূপী ঘাস  
কত কাল প্রাণ- রে ছড়ায়ে রবে- কাঁঠাল শাখার থেকে নামি  
পাখনা ডলিবে পেচাঁ এই ঘাসে- বাংলার সবুজ বালামী  
ধানী শাল পশমিনা বুকে তার - শরতের রোদের বিলাস

কতো কাল নিঙড়াবে; - আচলে নাটোর কথা ভুলে গিয়ে বুঝি  
কিশোরের মুখে চেয়ে কিশোরী করিবে তার মৃদু মাথা নিচু;  
আসন্ন সন্ধ্যার কাক- করুণ কাকের দল খোড়া নীড় খুঁজি  
উড়ে যাবে; - দুপুরে ঘাসের বুকে সিদুরের মতো রাঙা লিচু  
মুখে গুজে পড়ে রবে- আমিও ঘাসের বুকে রবো মুখ গুজি;  
মৃদু কাঁকনের শব্দ- গোরোচনা জিনি রং চিনিব না কিছু-



## তোমার বুকের থেকে

তোমার বুকের থেকে একদিন চলে যাবে তোমার সন্তান  
বাংলার বুক ছেড়ে চলে যাবে; যে ইঙ্গিতে নক্ষত্রও ঝরে,  
আকাশের নীলাভ নরম বুক ছেড়ে দিয়ে হিমের ভিতরে  
ডুবে যায়, - কুয়াশায় ঝ'রে পড়ে দিকে- দিকে রপশালী ধান  
একদিন; - হয়তো বা নিমপেঁচা অন্ধকারে গা'বে তার গান,  
আমারে কুড়ায়ে নেবে মেঠো হাঁদুরের মতো মরণের ঘরে -  
হৃদয়ে ক্ষদের গন্ধ লেগে আছে আকাঙ্ক্ষার তবু ও তো চোখের উপরে  
নীল, মৃত্যু উজাগর - বাঁকা চাঁদ, শূন্য মাঠ, শিশিরের ঘ্রাণ -

কখন মরণ আসে কে বা জানে - কালীদহে কখন যে ঝড়  
কমলের নাম ভাঙে - ছিঁড়ে ফেলে গাংচিল শালিকের প্রাণ  
জানি নাকো; - তবু যেন মরি আমি এই মাঠ - ঘাটের ভিতর,  
কৃষ্ণা যমুনায় নয় - যেন এই গাঙুড়ের ডেউয়ের আঘ্রাণ  
লেগে থাকে চোখে মুখে - রূপসী বাংলা যেন বুকের উপর  
জেগে থাকে; তারি নিচে শুয়ে থাকি যেন আমি অর্ধনারীশ্বর।



## গোলপাতা ছাউনির

গোলপাতা ছাউনির বুক চুমে নীল ধোঁয়া সকালে সন্ধ্যায়  
উড়ে যায়- মিশে যায় আমবনে কার্তিকের কুয়াশার সাথে;  
পুকুরের লাল সর ক্ষীণ ঢেউয়ে বার- বার চায় সে জড়াতে  
করবীর কচি ডাল; চুমো খেতে চায় মাছরাঙাটির পায়;  
এক- একটি ইট ধসে- ডুবজলে ডুব দিয়ে কোথায় হারায়  
ভাঙা ঘাটলায় এই- আজ আর কেউ এসে চাল- ধোয়া হাতে  
বিনুনি খসায় নাকো- শুকনো পাতা সারা দিন থাকে যে গড়াতে;  
কড়ি খেলিবার ঘর মজে গিয়ে গোখুরার ফাটলে হারায়;

ডাইনীর মতো হাত তুলে- তুলে ভাঁট আঁশশ্যাওড়ার বন  
বাতাসে কি কথা কয় বুঝি নাকো, - বুঝি নাকো চিল কেন কাঁদে  
পৃথিবীর কোনো পথে দেখি নই আমি, হয়, এমন বিজন  
শাদা পথ- সোঁদা পথ- বাঁশের ঘোমটা মুখে বিধবার ছাঁদে  
চলে গেছে শ্মশানের পারে বুঝি; - সন্ধ্যা সহসা কখন;  
সজিনার ডালে পঁচা কাঁদে নিম- নিম নিম কার্তিকের চাঁদে।



## অশ্বখে সন্ধ্যার হাওয়া

অশ্বখে সন্ধ্যার হাওয়া যখন লেগেছে নীল বাংলার বনে  
মাঠে মাঠে ফিরি একা: মনে হয় বাংলার জীবনে সঙ্কট  
শেষ হয়ে গেছে আজ; - চেয়ে দেখ কতো শত শতাব্দীর বট  
হাজার সবুজ পাতা লাল ফল বুকে লয়ে শাখার ব্যজনে  
আকাঙ্ক্ষার গান গায় - অশ্বখেরও কি যেন কামনা জাগে মনে :  
সতীর শীতল শব বহু দিন কোলে লয়ে যেন অকপট  
উমার প্রেমের গল্প পেয়েছে সে, চন্দ্রশেখরের মতো তার জট  
উজ্জ্বল হতেছে তাই সপ্তমীর চাঁদের আজ পুনরাগমনে;

মধুকুপী ঘাস- ছাওয়া ধলেশ্বরীটির পাড়ে গৌরী বাংলার  
এবার বল্লাল সেন আসিবে না জানি আমি - রায়গুণাকর  
আসিবে না - দেশবন্ধু আসিয়াছে খরধার পদ্যায় এবার,  
কালীগহে ক্লাস্ত গাংশালিখের ভিড়ে যেন আসিয়াছে ঝড়,  
আসিয়াছে চন্ডীদাস - রামপ্রসাদের শ্যামা সাথে সাথে তার;  
শঙ্খমালা, চন্দ্রমালা : মৃত শত কিশোরীর কঙ্কণের স্বর।  
( দেশবন্ধু : ১৩২৬- ১৩৩২ এর স্মরণে)



## ভিজে হয়ে আসে মেঘে

ভিজে হয়ে আসে মেঘে এ- দুপুর – চিল একা নদীটির পাশে  
জারুল গাছের ডালে বসে বসে চেয়ে থাকে ওপারের দিকে;  
পায়রা গিয়েছে উড়ে তবু চরে, খোপে তার; – শসাতাটিকে,  
ছেড়ে গেছে মৌমাছি; – কালো মেঘ জমিয়াছে মাঘের আকাশে,  
মরা প্রজাতিটির পাখার নরম রেণু ফেলে দিয়ে ঘাসে  
পিঁপড়েরা চলে যায়; – দুই দন্ড আম গাছে শালিখে – শালিখে  
ঝুটোপুটি, কোলাহল – বউকথাকও আর রাঙা বউটিকে  
ডাকে নাকো- হলুদ পাখনা তার কোন যেন কাঁঠালে পলাশে

হারায়েছে; বউ উঠানে নাই – প'ড়ে আছে একখানা টেঁকি;  
ধান কে কুটবে বলো- কত দিন সে তো আর কোটে নাকো ধান,  
রোদেও শুকাতে সে যে আসে নাকো চুল তার – করে নাকে স্নান  
এ- পুকুরে – ভাঁড়ারে ধানের বীজ কলায়ে গিয়েছে তার দেখি,  
তবুও সে আসে নাকে; আজ এ দুপুরে এসে খই ভাজিবে কি?  
হে চিল, সোনালি চিল, রাঙা রাজকন্যা আর পাবে না কি প্রাণ?



## খুঁজে তারে মরো মিছে

খুঁজে তারে মরো মিছে – পাড়াগাঁর পথে তারে পাবে নাকো আর;  
রয়েছে অনেক কাক এ উঠানে – তবু সেই ক্লান্ত দাঁড়কাক  
নাই আর; – অনেক বছর আগে আমে জামে হুঁষ্ট এক ঝাঁক  
দাঁড়কাক দেখা যেত দিন – রাত, – সে আমার ছেলেবেলাকার  
কবেকার কথা সব; আসিবে না পৃথিবীতে সেদিন আবার:  
রাত না ফুরাতে সে যে কদমের ডাল থেকে দিয়ে যেত ডাক, –  
এখনো কাকের শব্দে অন্ধকার ভোরে আমি বিমনা, অবাক  
তার কথা ভাবি শুধু; এত দিনে কোথায় সে? কি যে হলো তার

কোথায় সে নিয়ে গেছে সঙ্গে করে সেই নদী, ক্ষেত, মাঠ, ঘাস,  
সেই দিন, সেই রাত্রি, সেই সব ম্লান চুল, ভিজে শাদা হাত  
সেইসব নোনা গাছ, করমচা, শামুক গুগলি, কচি তালশাসঁ  
সেইসব ভিজে ধুলো, বেলকুড়ি ছাওয়া পথ, ধোয়া ওঠা ভাত,  
কোথায় গিয়েছে সব? – অসংখ্য কাকের শব্দে ভরিছে আকাশ  
ভোর রাতে – নবান্নের ভোরে আজ বুকে যেন কিসের আঘাত!



## পাড়াগাঁর দু'পহর

পাড়াগাঁর দু'পহর ভালোবাসি – রৌদ্র যেন গন্ধ লেগে আছে  
স্বপনের; – কোন গল্প, কি কাহিনী, কি স্বপ্ন যে বাঁধিয়াছে ঘর  
আমার হৃদয়ে, আহা, কেউ তাহা জানে নাকো – কেবল প্রান্তর  
জানে তাহা, আর ওই প্রান্তরের শঙ্খচিল; তাহাদের কাছে  
যেন এ- জনমে নয় – যেন ঢের যুগ ধরে কথা শিখিয়াছে  
এ – হৃদয় – স্বপ্নে যে বেদনা আছে : শুষ্ক পাতা – শালিখের স্বর,  
ভাঙা মঠ – নকশাপেড়ে শাড়িখানা মেয়েটির রৌদ্রের ভিতর  
হলুদ পাতার মতো স'রে যায়, জলসিঁড়িটির পাশে ঘাসে

শাখাগুলো নুয়ে আছে বহু দিন ছন্দহীন বুনো চালতার:  
জলে তার মুখখানা দেখা যায় – ডিঙিও ভাসিছে কার জলে,  
মালিক কোথাও নাই, কোনোদিন এই দিকে আসিবেনা আর,  
ঝাঁঝরা ফোঁপরা, আহা ডিঙিটিরে বেঁধে রেখে গিয়েছে হিজলে;  
পাড়াগাঁর দু – পহর ভালোবাসি – রৌদ্রে যেন ভিজে বেদনার  
গন্ধ লেগে আছে, আহা, কেঁদে কেঁদে ভাসিতেছে আকাশের তলে।



## কখন সোনার রোদ

কখন সোনার রোদ নিভে গেছে – অবিরল গুপ্তুরির সারি  
আঁধারে যেতেছে ডুবে – প্রান্তরের পার থেকে গরম বাতাস  
ক্ষুধিত চিলের মতো চৈত্রের এ অন্ধকার ফেলিতেছে শ্বাস;  
কোন চৈত্রে চলে গেছে সেই মেয়ে – আসিবে না করে গেছে আড়ি :  
ক্ষীরুই গাছের পাশে একাকী দাঁড়িয়ে আজ বলিতে কি পারি  
কোথাও সে নাই এই পৃথিবীতে তাহার শরীর থেকে শ্বাস  
ঝরে গেছে বলে তারে ভুলে গেছে নক্ষত্রের অসীম আকাশ,  
কোথাও সে নাই আর – পাব নাকো তারে কোনো পৃথিবী নিঙাড়ি?

এই মাঠে – এই ঘাসে ফল্‌সা এ- ক্ষীরুয়ে যে গন্ধ লেগে আছে  
আজও তার যখন তুলিতে যাই টেকিশাক – দুপুরের রোদে  
সর্ষের ক্ষেতের দিকে চেয়ে থাকি – অঘ্রাণে যে ধান ঝরিয়াছে  
তাহার দু- এক গুচ্ছ তুলে নিই, চেয়ে দেখি নির্জন আমোদে  
পৃথিবীর রাঙা রোদে চড়িতেছে আকাঙ্ক্ষায় চিনিচাঁপা গাছে –  
জানি সে আমার কাছে আছে আজো – আজো সে আমার কাছে কাছে।



## এই পৃথিবীতে এক

এই পৃথিবীতে এক স্থান আছে - সবচেয়ে সুন্দর করণ :  
সেখানে সবুজ ডাঙা ভ'রে আছে মধুকূপী ঘাসে অবিরল;  
সেখানে গাছের নাম : কাঁঠাল, অশ্বথ, বট, জারুল, হিজল;  
সেখানে ভোরের মেঘে নাটার রঙের মতো জাগিছে অরণ;  
সেখানে বারণী থাকে গঙ্গাপসাগরের বুকে, - সেখানে বরণ  
কর্ণফুলী ধলেশ্বরী পদ্মা জলাঙ্গীরে দেয় অবিরল জল;  
সেইখানে শঙ্খচিল পানের বনের মতো হাওয়ায় চঞ্চল,  
সেইখানে লক্ষ্মীপেঁচা ধানের গন্ধের মতো অক্ষুট, তরণ;

সেখানে লেবুর শাখা নুয়ে থাকে অন্ধকারে ঘাসের উপর;  
সুদর্শন উড়ে যায় ঘরে তার অন্ধকার সন্ধ্যার বাতাসে;  
সেখানে হলুদ শাড়ি লেগে থাকে রূপসীর শরীরের 'পর -  
শঙ্খমালা নাম তার : এ- বিশাল পৃথিবীর কোনো নদী ঘাসে  
তারে আর খুঁজে তুমি পাবে নাকো বিশালাক্ষী দিয়েছিল বর,  
তাই সে জন্মেছে নীল বাংলার ঘাস আর ধানের ভিতর।



## কত ভোরে- দু'- পহরে

কত ভোরে- দু'- পহরে - সন্ধ্যায় দেখি নীল শুপুরির বন  
বাতাসে কাঁপিছে ধীরে; - খাঁচার শুকের মতো গাহিতেছে গান  
কোন এক রাজকন্যা- পরনে ঘাসের শাড়ি- কালো চুলে ধান  
বাংলার শালিধান- আঙিনায় ইহাদের করেছে বরণ,  
হৃদয়ে জলের গন্ধ কন্যার- ঘুম নাই, নাইকো মরণ  
তার আর কোনোদিন- পালঙ্কে সে শোয় নাকো, হয় নাকো ম্লান,  
লঙ্কীপেঁচা শ্যামা আর শালিখের গানে তার জাগিতেছে প্রাণ-  
সারাদিন- সারারাত বুকে ক'রে আছে তারে শুপুরির বন;

সকালে কাকের ডাকে আলো আসে, চেয়ে দেখি কালো দাঁড়কাক  
সবুজ জঙ্গল ছেয়ে শুপুরির- শ্রীমন্তুও দেখেছে এমন :  
যখন ময়ূরপঙ্খী ভোরের সিন্ধুর মেঘে হয়েছে অবাক,  
সুদূর প্রবাস থেকে ফিরে এসে বাংলার শুপুরির বন  
দেখিয়াছে- অকস্মাৎ গাঢ় নীল : করুণ কাকের ক্লান্ত ডাক  
শুনিয়াছে- সে কত শতাব্দী আগে ডেকেছিল তাহারা যখন।



## এই ডাঙা ছেড়ে হয়

এই ডাঙা ছেড়ে হয় রূপ কে খুঁজিতে যায় পৃথিবীর পথে।  
বটের শুকনো পাতা যেন এক যুগান্তের গল্প ডেকে আনে:  
ছড়ায়ে রয়েছে তারা প্রান্তরের পথে পথে নির্জন অস্থানে; -  
তাদের উপেক্ষা ক'রে কে যাবে বিদেশে বলো- আমি কোনো- মতে  
বাসমতী ধানক্ষেত ছেড়ে দিয়ে মালাবারে- উটির পর্বতে  
যাব নাকো, দেখিব না পামগাছ মাথা নাড়ে সমুদ্রের গানে  
কোন দেশে, - কোথায় এলাচিফুল দারুচিনি বারুণীর প্রাণে  
বিনুনী খসায় ব'সে থাকিবার স্বপ্ন আনে; - পৃথিবীর পথে

যাব নাকো : অশ্বখের ঝরাপাতা ম্লান শাদা ধুলোর ভিতর,  
যখন এ- দু' - পহরে কেউ নাই কোনো দিকে- পাখিটিও নাই,  
অবিরল ঘাস শুধু ছড়ায়ে র'য়েছে মাটি কাঁকরের 'পর,  
খড়কুটো উল্টায়ে ফিরিতেছে দু'একটা বিষণ্ণ চড়াই,  
অশ্বখের পাতাগুলো প'ড়ে আছে ম্লান শাদা ধুলোর ভিতর;  
এই পথ ছেড়ে দিয়ে এ- জীবন কোনোখানে গেল নাকো তাই।



## এখানে আকাশ নীল

এখানে আকাশ নীল- নীলাভ আকাশ জুড়ে সজিনার ফুল  
ফুটে থাকে হিম শাদা- রং তার আশ্বিনের আলোর মতন;  
আকন্দফুলের কালো ভীমরুল এইখানে করে গুঞ্জরণ  
রৌদ্রের দুপুর ভ'রে; - বারবার রোদ তার সুচিকণ চুল  
কাঁঠাল জামের বুকে নিঙড়ায়ে; - দহে বিলে চঞ্চল আঙুল  
বুলায়ে বুলায়ে ফেরে এইখানে জাম লিচু কাঁঠালের বন,  
ধনপতি, শ্রীমন্তের, বেহুলার, লহনার ছুঁয়েছে চরণ;  
মেঠো পথে মিশে আছে কাক আর কোকিলের শরীরের ধূল,

কবেকার কোকিলের জানো কি তা? যখন মুকুন্দরাম, হয়,  
লিখিতেছিলেন ব'সে দু'পহরে সাধের সে চন্ডিকামঙ্গল,  
কোকিলের ডাক শুনে লেখা তাঁর বাধা পায়- থেমে থেমে যায়; -  
অথবা বেহুলা একা যখন চলেছে ভেঙে গাঙুড়ের জল  
সন্ধ্যার অন্ধকারে, ধানক্ষেতে, আমবনে, অস্পষ্ট শাখায়  
কোকিলের ডাক শুনে চোখে তার ফুটেছিল কুয়াশা কেবল।



## কোথাও মঠের কাছে

কোথাও মঠের কাছে – যেইখানে ভাঙা মঠ নীল হয়ে আছে  
শ্যাওলায় – অনেক গভীর ঘাস জমে গেছে বুকুর ভিতর,  
পাশে দীঘি মজে আছে – রূপালী মাছের কণ্ঠে কামনার স্বর  
যেইখানে পটরানী আর তার রূপসী সখীরা শুনিয়েছে  
বহু বহু দিন আগে – যেইখানে শঙ্খমালা কাঁথা বুনিয়েছে  
সে কত শতাব্দী আগে মাছরাঙা – ঝিলমিল – কড়ি খেলা ঘর;  
কোন যেন কুহকীর ঝাঁড়ফুঁকে ডুবে গেছে সব তারপর  
একদিন আমি যাব দু-প্রহরে সেই দূর প্রান্তরের কাছে,

সেখানে মানুষ কেউ যায় নাকে – দেখা যায় বাঘিনীর ডোরা  
বেতের বনের ফাঁকে – জারুল গাছের তলে রৌদ্র পোহায়  
রূপসী মৃগীর মুখ দেখা যায়, – শাদা ভাঁট পুষ্পের তোড়া  
আলোকতার পাশে গন্ধ ঢালে দ্রোণফু বাসকের গায়;  
তবুও সেখানে আমি নিয়ে যাবো একদিন পাটকিলে ঘোড়া  
যার রূপ জন্মে – জন্মে কাঁদায়েছে আমি তারে খুঁজিব সেথায়।



## চ'লে যাব শুকনো পাতা- ছাওয়া

চ'লে যাব শুকনো পাতা- ছাওয়া ঘাসে – জামরুল হিজলের বনে;  
তলতা বাঁশের ছিপ হাতে রবে – মাছ আমি ধরিব না কিছু; –  
দীঘির জলের গন্ধে রূপালি চিতল আর রূপসীর পিছু  
জামের গভীর পাতা – মাথা শান্ত – নীল জলে খেলিছে গোপনে;  
আনারস ঝোপে ওই মাছরাঙা তার মাছরাঙাটির মনে  
অস্পষ্ট আলোয় যেন মুছে যায় – সিঁদুরের মতো রাঙা লিচু  
ঝড়ে পড়ে পাতা ঘাসে, – চেয়ে দেখি কিশোরী করেছে মাথা নিচু –  
এসেছে সে দুপুরের অবসরে জামরুল লিচু আহরণে –

চলে যায়; নীলাম্বরী সরে যায় কোকিলের পাখনার মতো  
ক্ষীরায়ের শাখা ছুঁয়ে চালতার ডাল ছেড়ে বাঁশের পিছনে  
কোনো দূর আকাঙ্ক্ষার ক্ষেতে মাঠে চলে যায় যেন অব্যহত,  
যদি তার পিছে যাও দেখিবে সে আকন্দের করবীর বনে  
ভোমরার ভয়ে ভীৰু – বহুক্ষণ পায়চারি করে আনমনে  
তারপর চলে গেল : উড়ে গেল যেন নীল ভোমরার সনে।



## এখানে ঘুঘুর ডাকে

এখানে ঘুঘুর ডাকে অপরাহ্নে শান্তি আসে মানুষের মনে;  
এখানে সবুজ শাখা আঁকাবাঁকা হলুদ পাখিরে রাখে ঢেকে;  
জামের আড়ালে সেই বউকথাকওটিরে যদি ফেল দেখে  
একবার – একবার দু’পহর অপরাহ্নে যদি এই ঘুঘুর গুঞ্জে  
ধরা দাও – তাহলে অনন্তকাল থাকিতে যে হবে এই বনে;  
মৌরির গন্ধমাখা ঘাসের শরীরে ক্লান্ত দেহটিরে রেখে  
আশ্বিনের ক্ষেতঝরা কচি কচি শ্যামা পোকাদের কাছে ডেকে

রব আমি চকোরীর সাথে যেন চকোরের মতন মিলনে;  
উঠানে কে রূপবতী খেলা করে – ছাড়ায়ে দিতেছে বুঝি ধান  
শালিখের; ঘাস থেকে ঘাসে ঘাসে খুঁটে খুঁটে খেতেছে সে তাই;  
হলুদ নরম পায়ে খয়েরি শালিখগুলো ডরিছে উঠান;  
চেয়ে দ্যাখো সুন্দরীরে : গোরোচনা রূপ নিয়ে এসেছে কি রাই!  
নীলনদে – গাঢ় রৌদ্রে – কবে আমি দেখিয়াছি – করেছিল স্নান –



## শ্মশানের দেশে তুমি

শ্মশানের দেশে তুমি আসিয়াছ – বহুকাল গেয়ে গেছ গান  
সোনালি চিলের মতো উড়ে উড়ে আকাশের রৌদ্র আর মেঘে, –  
লক্ষ্মীর বাহন যেই স্নিগ্ধ পাখি আশ্বিনের জ্যোৎস্নার আবেগে  
গান গায় – শুনিয়াছি রাখিপূর্ণিমার রাতে তোমার আহ্বান  
তার মতো; আম চাঁপা কদমের গাছ থেকে গাহে অফুরান  
যেন স্নিগ্ধ ধান ঝরে.. অনন – সবুজ শালি আছে যেন লেগে  
বুকে তব; বল্লালের বাংলায় কবে যে উঠলে তুমি জেগে;  
পদ্মা, মেঘনা, ইছামতী নয় শুধু – তুমি কবি করিয়াছ স্নান

সাত সমুদ্রের জলে, – ঘোড়া নিয়ে গেছ তুমি ধূম নারীবেশে  
অর্জুনের মতো, আহা, – আরো দূর স্নান নীল রূপের কুয়াশা  
ফুঁড়েছ সুপর্ণ তুমি – দূর রং আরো দূর রেখা ভালোবেসে;  
আমাদের কালীদাহ – গাঙুড় – গাঙের চিল তবু ভালোবাসা  
চায় যে তোমার কাছে – চায়, তুমি ঢেলে দাও নিজেই নিঃশেষে  
এই দহে – এই চূর্ণ মঠে – মঠে – এই জীর্ণ বটে বাঁধো বাসা।



## তবু তাহা ভুল জানি

তবু তাহা ভুল জানি – রাজবল্লভের কীর্তি ভাঙে কীর্তিনাশা:  
তবুও পদ্মার রূপ একুশরত্নের চেয়ে আরো ঢের গাঢ় –  
আরো ঢের প্রাণ তার, বেগ তার, আরো ঢের জল, জল আরো;  
তোমারো পৃথিবী পথ; নক্ষত্রের সাথে তুমি খেলিতেছ পাশা:  
শঙ্খমালা নয় শুধু: অনুরাধা রোহিনীর ও চাও ভালোবাসা,  
না জানি সে কতো আশা – কতো ভালোবাসা তুমি বাসিতে যে পার!  
এখানে নদীর ধারে বাসমতী ধানগুলো ঝরিছে আবো;  
প্রান্তরের কুয়াশায় এখানে বাদুড়ের যাওয়া আর আসা –

এসেছে সন্ধ্যার কাক ঘরে ফিরে, – দাঁড়ায়ে রয়েছে জীর্ণ মঠ,  
মাঠের আঁধার পথে শিশু কাঁদে – লালপেড়ে পুরানো শাড়ির  
ছবিটি মুছিয়া যায় ধীরে ধীরে – কে এসেছে আমার নিকট?  
কার শিশু? বলো তুমি: শুধালাম, উত্তর দিলো না কিছু বটে;  
কেউ নাই কোনোদিকে – মাঠে পথে কুয়াশার ভিড়;  
তোমারে শুধাই কবি: তুমিও কি জানো কিছু এই শিশুটির।



## সোনার খাঁচার বুক

সোনার খাঁচার বুক রহিব না আমি আর শুকের মতন;  
কি গল্প শুনতে চাও তোমরা আমার কাছে – কোন্ কোন্ গান, বলো,  
তাহলে এ – দেউলের খিলানের গল্প ছেড়ে চলো, উড়ে চলো, –  
যেখানে গভীর ভোরে নোনাফল পাকিয়াছে, – আছে আতাবন,  
পউষের ভিজে ভোরে, আজ হয় মন যেন করিছে কেমন; –  
চন্দ্রমালা, রাজকন্যা, মুখ তুলে চেয়ে দেখ – শুধাই, শুন লো,  
কি গল্প শুনতে চাও তোমরা আমার কাছে, – কোন্ গান বলো,  
আমার সোনার খাঁচা খুলে দাও, আমি যে বনের হীরামন;

রাজকন্যা শোনে নাকো – আজ ভোরে আরসীতে দেখে নাকো মুখ,  
কোথায় পাহাড় দূরে শাদা হয়ে আছে যেন কড়ির মতন, –  
সেই দিকে চেয়ে – চেয়ে দিনভোর ফেটে যায় রূপসীর বুক,  
তবুও সে বোঝে না কি আমারো যে সাধ আছে – আছে আনমন  
আমারো যে – চন্দ্রমালা, রাজকন্যা, শোনো – শোনো তোলো তো চিবুক।  
হাড়পাহাড়ের দিকে চেয়ে চেয়ে হিম গেছে তার স্নান।



## কত দিন সন্ধ্যার

কত দিন সন্ধ্যার অন্ধকারে মিলিয়াছি আমরা দুজনে;  
আকাশ প্রদীপ জ্বলে তখন কাহারা যেন কার্তিকের মাস  
সাজায়েছে, - মাঠ থেকে গাজন গানের স্নান ধোঁয়াটে উচ্ছ্বাস  
ভেসে আসে; ডানা তুলে সাপমাসী উড়ে যায় আপনার মনে  
আকন্দ বনের দিকে; একদল দাঁড়কাক স্নান গুঞ্জরণে  
নাটার মতন রাঙা মেঘ নিঙড়ায়ে নিয়ে সন্ধ্যার আকাশ  
দু'মুহূর্ত ভরে রাখে - তারপর মৌরির গন্ধমাখা ঘাস  
পড়ে থাক: লক্ষ্মীপেঁচা ডাল থেকে ডালে শুধু উড়ে চলে বনে

আধো ফোটা জ্যোৎস্নায়; তখন ঘাসের পাশে কতদিন তুমি  
হলুদ শাড়িটি বুকে অন্ধকারে ফিঙ্গার পাখনার মতো  
বসেছ আমার কাছে এইখানে - আসিয়াছে শটিবন চুমি  
গভীর আঁধার আরো - দেখিয়াছি বাদুড়ের মৃদু অবিরত  
আসা - যাওয়া আমরা দুজনে বসে বলিয়াছি ছেঁড়াফাঁড়া কত  
মাঠ ও চাঁদের কথা: স্নান চোখে একদিন সব শুনেছ তো।



## এ- সব কবিতা আমি

এ- সব কবিতা আমি যখন লিখেছি বসে নিজ মনে একা;  
চালতার পাতা থেকে টুপ – টুপ জ্যোৎস্নায় ঝরছে শিশির;  
কুয়াশায় স্থির হয়ে ছিল স্নান ধানসিড়ি নদীটির তীরে;  
বাদুড় আধাঁর ডানা মেলে হিম জ্যোৎস্নায় কাটিয়াছে রেখা  
আকাঙ্ক্ষার; নিভু দীপ আগলায়ে মনোরমা দিয়ে গেছে দেখা  
সঙ্গে তার কবেকার মৌমাছির.... কিশোরীর ভিড়  
আমের বউল দিল শীতরাতে; – আনিল আতার হিম ক্ষীর;  
মলিন আলোয় আমি তাহাদের দেখিলাম, – এ কবিতা লেখা

তাহাদের স্নান মনে কবে, তাহাদের কড়ির মতন  
ধূসর হাতের রূপ মনে করে; তাহাদের হৃদয়ের তরে।  
সে কত শতাব্দী আগে তাহাদের করুণ শঙ্খের মতো স্তন  
তাহাদের হলুদ শাড়ি – ক্ষীর দেহ – তাহাদের অপরূপ মন  
চলে গেছে পৃথিবীর সব চেয়ে শান্ত হিম সান্ত্বনার ঘরে :  
আমার বিষন্ন স্বপ্নে থেকে থেকে তাহাদের ঘুম ভেঙে পড়ে।



## কত দিন তুমি আমি

কত দিন তুমি আমি এসে এইখানে বসিয়াছি ঘরের ভিতর  
খড়ের চালের নিচে, অন্ধকারে; - সন্ধ্যার ধূসর সজল  
মৃদু হাত খেলিতেছে হিজল জামের ডালে - বাদুড় কেবল  
করিতেছে আসা- যাওয়া আকাশের মৃদু পথে - ছিন্ন ভিজে খড়  
বুকে নিয়ে সনকার মতো যেন পড়ে আছে নরম প্রান্তর;  
বাঁকা চাঁদ চেয়ে আছে - কুয়াশায় গা ভাসিয়ে দেয় অবিরল  
নিঃশব্দ গুবরে পোকা - সাপমাসী - ধানী শ্যামাপোকাদের দল;  
দিকে দিকে চালধোয়া গন্ধ মৃদু - ধূসর শাড়ির ক্ষীণ স্বর

শোনা যায় - মানুষের হৃদয়ের পুরোনো নীরব  
বেদনার গন্ধ ভাসে - খড়ের চালের নিচে তুমি আর আমি  
কতদিন মলিন আলোয় বসে দেখেছি বুঝেছি এই সব;  
সময়ের হাত থেকে ছুটি পেয়ে স্বপনের গোধূলিতে নামি  
খড়ের চালের নিচে মুখোমুখি বসে থেকে তুমি আর আমি  
ধূসর আলোয় বসে কতদিন দেখেছি বুঝেছি এইসব।



## এখানে প্রাণের স্রোত

এখানে প্রাণের স্রোত আসে যায় – সন্ধ্যায় ঘুমায় নীরবে  
মাটির ভিটের ‘পরে – লেগে থাকে অন্ধকারে ধুলোর আঘাণ  
তাহাদের চোখে – মুখে; – কদমের ডালে পেঁচা কথা কবে –  
কাঁঠালের ডাল থেকে হিজলের ডালে গিয়ে করিবে আহ্বান  
সাপমাসী পোকাটিরে... সেই দিন আঁধারে উঠিবে নড়ে ধান  
ইঁদুরের ঠোঁটে – চোখে; বাদুড়ের কালো ডানা করমচা পল্লবে

কুয়াশারে নিঙড়ায়ে উড়ে যাবে আরো দূর নীল কুয়াশায়,  
কেউ তাহা দেখিবে না; – সেদিন এ পাড়াগাঁর পথের বিক্ষয়  
দেখিতে পাবো না আর – ঘুমায়ে রহিবে সব; যেমন ঘুমায়  
আজ রাতে মৃত যারা; যেমন হতেছে ঘুমে ক্ষয়  
অশ্বখ ঝাউয়ের পাতা চুপে – চুপে আজ রাতে, হয়;  
যেমন ঘুমায় মৃত, – তাহার বুকের শাড়ি যেমন ঘুমায়।



## একদিন যদি আমি

একদিন যদি আমি কোনো দূর বিদেশের সমুদ্রের জলে  
ফেনার মতন ভাসি শীত রাতে – আসি নাকো তোমাদের মাঝে  
ফিরে আর – লিচুর পাতার ‘পরে বহুদিন সাঁঝে  
যেই পথে আসা- যাওয়া করিয়াছি, – একদিন নক্ষত্রের তলে  
কয়েকটা নাটাফল তুলে নিয়ে আনারসী শাড়ির আঁলে  
ফিঙার মতন তুমি লঘু চোখে চলে যাও জীবনের কাজে,  
এই শুধু... বেজির পায়ের শব্দ পাতার উপড়ে যদি বাজে  
সারারাত... ডানার অস্পষ্ট ছায়া বাদুড়ের ক্লাস্ত হয়ে চলে

যদি সে পাতার ‘পরে, – শেষ রাতে পৃথিবীর অন্ধকারে শীতে  
তোমার ক্ষীরের মতো মৃদু দেহ – ধূসর চিবুক, বাম হাত  
চালতা গাছের পাশে খোঁড়া ঘরে স্নিগ্ধ হয়ে ঘুমায় নিভতে,  
তবুও তোমার ঘুম ভেঙে যাবে একদিন চুপে অকস্মাৎ  
তুমি যে কড়ির মালা দিয়েছিলে – সে হার ফিরায়ে দিয়ে দিতে  
যখন কে এক ছায়া এসেছিল... দরজায় করেনি আঘাত।



## দূর পৃথিবীর গন্ধে

দূর পৃথিবীর গন্ধে ভরে ওঠে আমার এ বাঙালির মন  
আজ রাতে; একদিন মৃত্যু এসে যদি দূর নক্ষত্রের তলে  
অচেনা ঘাসের বুকো আমারে ঘুমায়ে যেতে বলে  
তবুও সে ঘাস এই বাংলার অবিরল ঘাসের মতন  
মউরীর মৃদু গন্ধে ভরে রবে, - কিশোরীর স্তন  
প্রথম জননী হয়ে যেমন নরম দুখে গলে  
পৃথিবীর সব দেশে-সব চেয়ে ঢের দূর নক্ষত্রের তলে  
সব পথে এই সব শান্তি - আছে: ঘাস - চোখ - শাদা হাত - স্তন -

কোথাও আসিবে মৃত্যু - কোথাও সবুজ মৃদু ঘাস  
আমারে রাখিবে ঢেকে - ভোরে, রাতে, দু'পহরে পাখির হৃদয়  
ঘাসের মতন সাথে ছেয়ে রবে রাতের আকাশ  
নক্ষত্রের নীল ফুলে ফুটে রবে - বাংলার নক্ষত্র কি নয়?  
জানি নাকো; তবুও তাদের বুকো স্থির শান্তি- শান্তি লেগে যায়;  
আকাশের বুকো তারা যেন চোখ - শাদা হাত যেন স্তন - ঘাস - ।



## অশ্বখ বটের পথে

অশ্বখ বটের পথে অনেক হয়েছি আমি তোমাদের সাথী;  
ছড়ায়েছি খই ধান বহুদিন উঠানের শালিখের তরে;  
সন্ধ্যায় পুকুর থেকে হাঁসটিরে নিয়ে আমি তোমাদের ঘরে  
গিয়েছি অনেক দিন, - দেখিয়াছি ধূপ জ্বালো, ধরো সন্ধ্যাবাতি  
থোড়ের মতন শাদা ভিজে হাতে, - এখুনি আসিবে কিনা রাতি  
বিনুনি বেঁধেছ তাই - কাঁচপোকটিপ তুমি কপালের 'পরে  
পড়িয়াছ... তারপর ঘুমায়েছ: কঙ্কাপাড় আঁচলটি ঝরে  
পানের বাটার 'পরে; নোনার মতন নম্র শরীরটি পাতি

নির্জন পালঙ্কে তুমি ঘুমায়েছ, - বউকথাকওটির ছানা  
নীল জামরুল নীড়ে - জ্যোৎস্নায় - ঘুমায়ে রয়েছে যেন, হয়,  
আর রাত্রি মাতাপাখিটির মতো ছড়ায়ে রয়েছে তার ডানা।...  
আজ আমি ক্লান্ত চোখে ব্যবহৃত জীবনের ধুলোয় কাঁটায়  
চলে গে'ছি বহু দূরে; - দেখোনিকো, বোঝানিকো, করোনিকো মানা  
রূপসী শঙ্খের কোঁটা তুমি যে গো প্রাণহীন - পানের বাটায়।  
( ১৩২৬ - এর কতকগুলো দিনের স্মরণে)



## ঘাসের বুকের থেকে

ঘাসের বুকের থেকে কবে আমি পেয়েছি যে আমার শরীর -  
সবুজ ঘাসের থেকে; তাই রোদ ভালো লাগে - তাই নীলাকাশ  
মুদু ভিজে সক্রমণ মনে হয়; - পথে পথে তাই এই ঘাস  
জলের মতন স্নিগ্ধ মনে হয়, - কউমাছীদের যেন নীড়  
এই ঘাস; - যত দূর যাই আমি আরো যত দূর পৃথিবীর  
নরম পায়ের তলে যেন কত কুমারীর বুকের নিঃশ্বাস  
কথা কয় - তাহাদের শান্ত -হাত খেলা করে -তাদের খোঁপায় এলো ফাঁস  
খুলে যায় - ধূসর শাড়ির গন্ধে আসে তারা - অনেক নিবিড়

পুরোনো প্রাণের কথা কয়ে যায় - হৃদয়ের বেদনার কথা -  
সান্ত্বনার নিভৃত নরম কথা - মাঠের চাঁদের গল্প করে -  
আকাশের নক্ষত্রের কথা কয়; - শিশিরের শীত সরলতা  
তাহাদের ভালো লাগে, - কুয়াশারে ভালো লাগে চোখের উপরে;  
গরম বৃষ্টির ফোঁটা ভালো লাগে; শীত রাতে - পেঁচার নম্রতা;  
ভালো লাগে এই যে অশ্বথ পাতা আমপাতা সারারাত ঝরে।



## এই জল ভালো লাগে

এই জল ভালো লাগে; বৃষ্টির রূপালি জল কত দিন এসে  
ধুয়েছে আমার দেহ – বুলায়ে দিয়েছে চুল – চোখের উপরে  
তার শান্ত – স্নিগ্ধ হাত রেখে কত খেলিয়াছে, – আবেগের ভরে  
ঠোঁটে এসে চুমা দিয়ে চলে গেছে কুমারীর মতো ভালোবেসে;  
এই জল ভালো লাগে; – নীলপাতা মৃদু ঘাস রৌদ্রের দেশে  
ফিঙ্গা যেমন তার দিনগুলো ভালোবাসে – বনের ভিতর  
বার বার উড়ে যায়, – তেমনি গোপন প্রেমে এই জল ঝরে  
আমার দেহের পরে আমার চোখের পরে ধানের আবেশে

ঝরে পড়ে; – যখন অঘ্রাণ রাতে ভরা ক্ষেত হয়েছে হলুদ,  
যখন জামের ডালে পেঁচার নরম হিম গান শোনা যায়,  
বনের কিনা ঝরে যেই ধান বুকু করে শান্ত – শালক্ষুদ,  
তেমনি ঝরিছে জল আমার ঠোঁটের পরে চোখের পাতায় –  
আমার চুলের পরে, – অপরাহ্নে রাঙা রোদে সবুজ আতায়  
রেখেছে নরম হাত যেন তার – ঢালিছে বুকুর থেকে দুধ।



## একদিন পৃথিবীর পথে

একদিন পৃথিবীর পথে আমি ফেলিয়াছি, আমার শরীর  
নরম ঘাসের পথে হাঁটিয়াছে; বসিয়াছে ঘাসে  
দেখিয়াছে নক্ষত্রের জোনাকিপোকাকার মতো কৌতুকের অমেয় আকাশে  
খেলা করে; নদীর জলের গন্ধে ভরে যায় ভিজে স্নিগ্ধ তীর  
অন্ধকারে; পথে পথে শব্দ পাই কাহাদের নরম শাড়ির,  
ম্লান চুল দেখা যায়; সান্ত্বনার কথা নিয়ে কারা আসে -  
ধূসর কড়ির মতো হাতগুলো - নগ্ন হাত সন্ধ্যার বাতাসে  
দেখা যায়: হলুদ ঘাসের কাছে মরা হিম প্রজাপতিটির

সুন্দর করুণ পাখা পড়ে আছে - দেখি আমি; - চুপে থেমে থাকি;  
আকাশে কমলা রঙ ফুটে ওঠে সন্ধ্যায় - কাকগুলো নীল মনে হয়;  
অনেক লোকের ভিড়ে ডুবে যাই - কথা কই - হাতে হাত রাখি;  
করুণ বিষন্ন চুলে কার যেন কোথাকার গভীর বিস্ময়  
লুকায়ে রয়েছে বুঝি... নক্ষত্রের নিচে আমি ঘুমাই একাকী;  
পেঁচার ধূসর ডানা সারারাত জোনাকির সাথে কথা কয়।



## পৃথিবীর পথে আমি

পৃথিবীর পথে আমি বহুদিন বাস করে হৃদয়ের নরম কাতর  
অনেক নিভৃত কথা জানিয়াছি; পৃথিবীতে আমি বহুদিন  
কাটায়েছি; বনে বনে ডালপালা উড়িতেছে – যেন পরী জিন্  
কথা কয়; ধূসর সন্ধ্যায় আমি ইহাদের শরীরের পর  
খইয়ের ধানের মতো দেখিয়াছি ঝরে ঝর ঝর  
দু- ফোটা মেঘের বৃষ্টি, – শাদা ধুলো জলে ভিজে হয়েছে মলিন,  
ম্লান গন্ধ মাঠে ক্ষেতে... গুবরে পোকাকার তুচ্ছ বুক থেকে ক্ষীণ  
অস্ফুট করুণ শব্দ ডুবিতেছে অন্ধকারে নদীর ভিতর:  
এই সব দেখিয়াছি; – দেখিয়াছি নদীটিরে – মজিতেছে ঢালু অন্ধকারে;

সাপমাসী উড়ে যায়; দাঁড়কাক অশ্বথে'র নীড়ের ভিতর  
পাখনার শব্দ করে অবিরাম; কুয়াশায় একাকী মাঠের ঐ ধারে  
কে যেন দাঁড়ায়ে আছে: আরো দূরে দু একটা স্তম্ভ খোড়ো ঘর  
পড়ে আছে; – খাগড়ার বনে ব্যাং ডাকে কেন – থামিতে কি পারে;  
'তুমি কেন এইখানে', 'তুমি কেন এইখানে' – শরের বনের থেকে দেয় সে উত্তর।  
(আবার পাখনা নাড়ে – কাকের তরণ ডিম পিছলায়ে প'ড়ে যায় শ্যাওড়ার ঝাড়ে।)



## মানুষের ব্যথা আমি

মানুষের ব্যথা আমি পেয়ে গেছি পৃথিবীর পথে এসে – হাসির আনন্দ পেয়ে গেছি; দেখেছি আকাশে দূরে কড়ির মতন শাদা মেঘের পাহাড়ে সূর্যের রাঙা ঘোড়া; পক্ষিরাজের মতো কমলা রঙের পাখা ঝাড়ে রাতের কুয়াশা ছিঁড়ে; দেখেছি শরের বনে শাদা রাজহাঁসদের সাধ উঠেছে আনন্দে জেগে – নদীর স্রোতের দিকে বাতাসের মতন অবাধ চলে গেছে কলরবে; –দেখেছি সবুজ ঘাস – যত দূর চোখ যেতে পারে; ঘাসের প্রকাশ আমি দেখিয়াছি অবিরল, – পৃথিবীর ক্লান্ত বেদনারে ঢেকে আছে; – দেখিয়াছি বাসমতী, কাশবন আকাজ্জার রক্ত, অপরাধ

মুছায়ে দিতেছে যেন বার বার কোন এক রহস্যের কুয়াশার থেকে যেখানে জন্মে না কেউ, যেখানে মরে না কেউ, সেই কুহকের থেকে এসে রাঙা রোদ, শালিধান, ঘাস, কাশ, মরালেরা বার বার রাখিতেছে ঢেকে আমাদের রক্ষ প্রশ্ন, ক্লান্ত ক্ষুধা, স্ফুট মৃত্যু – আমাদের বিস্মিত নীরব রেখে দেয় – পৃথিবীর পথে আমি কেটেছি আঁড় ঢের, অশ্রু গেছি রেখে তবু ঐ মরালীরা কাশ ধান রোদ ঘাস এসে এসে মুছে দেয় সব।



## তুমি কেন বহু দূরে

তুমি কেন বহু দূরে - চের দূর - আরো দূরে - নক্ষত্রের অস্পষ্ট আকাশ  
তুমি কেন কোনদিন পৃথিবীর ভিড়ে এসে বলো নাকো একটিও কথা;  
আমরা মিনার গড়ি - ভেঙে পড়ে দুদিনেই - স্বপনের ডানা ছিড়ে ব্যথা  
রক্ত হয়ে ঝরে শুধু এইখানে - ক্ষুধা হয়ে ব্যথা দেয় - নীল নাভিশ্বাস;  
ফেনায়ে তুলিছে শুধু পৃথিবীতে পিরামিড যুগ থেকে আজো বারোমাস;  
আমাদের সত্য, আহা রক্ত হয়ে ঝরে শুধু; - আমাদের প্রাণের মমতা  
ফড়িঙের ডানা নিয়ে ওড়ে, আহা: চেয়ে দেখে অন্ধকার কঠিন ক্ষমতা  
ক্ষমাহীন - বার বার পথ আটকায়ে ফেলে বার বার করে তারে গ্রাস;

তারপর চোখ তুলে দেখি ঐ কোন দূর নক্ষত্রের ক্লান্ত আয়োজন  
ক্লানি - র ভুলিতে বলে - ঘিয়ের সোনার দীপে লাল নীল শিখা  
জ্বলিতেছে যেন দূর রহস্যের কুয়াশায়, - আবার স্বপ্নের গন্ধে মন  
কেঁদে ওঠে - তবু জানি আমাদের স্বপ্ন হতে অশ্রু ক্লানি - রক্তের কণিকা  
ঝরে শুধু - স্বপ্ন কি দেখেনি বুদ্ধ - নিউসিডিয়ায় বসে দেখেনি মণিকা?  
স্বপ্ন কি দেখেনি রোম, এশিরিয়া, উজ্জয়িনী, গৌড় - বাংলা, দিল্লী, বেবিলন?



## আমাদের রুঢ় কথা

আমাদের রুঢ় কথা শুনে তুমি সরে যাও আরো দূরে বুঝি নীলাকাশ;  
তোমার অনন্ত নীল সোনালি ভোমরা নিয়ে কোনো দূর শান্তির ভিতরে  
ডুবে যাবে? কত কাল কেটে গেল, তবু তার কুয়াশার পর্দা না সরে  
পিরামিড বেবিলন শেষ হল – ঝরে গেল কতবার প্রান্তরের ঘাস;  
তবুও লুকায়ে আছে যেই রূপ নক্ষত্রে তা কোনোদিন হল না প্রকাশ:  
যেই স্বপ্ন যেই সত্য নিয়ে আজ আমরা চলিয়া যাই ঘরে,  
কোনো এক অন্ধকারে হয়তো তা আকাশের যাযাবর মরালের স্বরে  
নতুন স্পন্দন পায় নতুন আগ্রহে গন্ধে ভরে ওঠে পৃথিবীর শ্বাস;

তখন আমরা ওই নক্ষত্রের দিকে চাই – মনে হয় সব অস্পষ্টতা  
ধীরে ধীরে ঝরিতেছে, –যেই রূপ কোনোদিন দেখি নাই পৃথিবীর পথে,  
যেই শানি – মৃত জননীর মতো চেয়ে থাকে – কয় নাকো কথা,  
যেই স্বপ্ন বার বার নষ্ট হয় আমাদের এই সত্য রক্তের জগতে,  
আজ যাহা ক্লান্ত ক্ষীণ আজ যাহা নগ্ন চূর্ণ – অন্ধ মৃত হিম,  
একদিন নক্ষত্রের দেশে তারা হয়ে রবে গোলাপের মতন রক্তিম।



## এই পৃথিবীতে আমি

এই পৃথিবীতে আমি অবসর নিয়ে শুধু আসিয়াছি – আমি হুঁষ্ট কবি  
আমি এক; – ধুয়েছি আমার দেহ অন্ধকারে একা একা সমুদ্রের জলে;  
ভালোবাসিয়াছি আমি রাঙা রোদ, ক্ষান্ত কার্তিকের মাঠে – ঘাসের আঁচলে  
ফড়িঙের মতো আমি বেড়ায়েছি – দেখেছি কিশোরী এস হলুদ করবী  
ছিঁড়ে নেয় – বুকুে তার লাল পেড়ে ভিজে শাড়ি করুন শঙ্খের মতো ছবি  
ফুটাতেছে – ভোরের আকাশখানা রাজহাস ভরে গেছে নব কোলাহলে  
নব নব সূচনার: নদীর গোলাপী ঢেউ কথা বলে – তবু কথা বলে,  
তবু জানি তার কথা কুয়াশায় ফুরায় না – কেউ যেন শুনিতেছে সবি

কোন রাঙা শাটিনের মেঘে বসে – অথবা শোনে না কেউ, শূণ্য কুয়াশায়  
মুছে যায় সব তার; একদিন বর্ণচ্ছটা মুছে যাবো আমিও এমন;  
তবু আজ সবুজ ঘাসের পরে বসে থাকি; ভালোবাসি; প্রেমের আশায়  
পায়ের ধ্বনির দিকে কান পেতে থাকি চুপে; কাঁটাবহরের ফল করি আহরণ  
কারে যেন এই গুলো দেবো আমি; মৃদু ঘাসে একা – একা বসে থাকা যায়  
এই সব সাধ নিয়ে; যখন আসিবে ঘুম তারপর, ঘুমাব তখন।



## বাতাসে ধানের শব্দ

বাতাসে ধানের শব্দ শুনিয়েছি – ঝরিতেছে ধীরে ধীরে অপরাহ্নে ভরে;  
সোনালি রোদের রঙ দেখিয়েছি – দেহের প্রথম কোন প্রেমের মতন  
রূপ তার – এলোচুল ছড়িয়ে রেখেছ ঢেকে গুট রূপ – আনারস বন;  
ঘাস আমি দেখিয়েছি; দেখেছি সজনে ফুল চুপে চুপে পড়িতেছে ঝরে  
মৃদু ঘাসে; শান্তি পায়; দেখেছি হলুদ পাখি বহুক্ষণ থাকে চুপ করে,  
নির্জন আমের ডালে দুলে যায় – দুলে যায় – বাতাসের সাথে বহুক্ষণ,  
শুধু কথা, গান নয় – নীরবতা রচিত্তেছে আমাদের সবার জীবন  
বুঝিয়েছি; শুপুরীর সারিগুলো দিনরাত হাওয়ায় যে উঠিতেছে নড়ে,

দিনরাত কথা নয়, ক্ষীরের মতন ফুল বুকে ধরে, তাদের উৎসব  
ফুরায় না; মাছরাঙাটির সাথী মরে গেছে – দুপুরের নিঃসঙ্গ বাতাসে  
তবু ওই পাখিটির নীল লাল কমলা রঙের ডানা স্ফুট হয়ে ভাসে  
আম নিম্ন জামরুলে; প্রসন্ন প্রাণের স্রোত – অশ্রু নাই – প্রশ্ন নাই কিছু,  
ঝিলঝিল ডানা নিয়ে উড়ে যায় আকাশের থেকে দূর আকাশের পিছু,  
চেয়ে দেখি ঘুম নাই – অশ্রু নাই – প্রশ্ন নাই বটফলগন্ধ- মাখা ঘাসে



## একদিন এই দেহ

একদিন এই দেহ ঘাস থেকে ধানের আঘ্রাণ থেকে এই বাংলায়  
জেগেছিল; বাঙালী নারীর মুখ দেখে রূপ চিনেছিলো দেহ একদিন;  
বাংলার পথে পথে হেঁটেছিলো গাংচিল শালিখের মতন স্বাধীন;  
বাংলার জল দিয়ে ধুয়েছিল ঘাসের মতন স্ফুট দেহখানি তার;  
একদিন দেখেছিল ধূসর বকের সাথে ঘরে চলে আসে অন্ধকার  
বাংলার; কাঁচা কাঠ জ্বলে ওঠে – নীল ধোঁয়া নরম মলিন  
বাতাসে ভাসিয়া যায় কুয়াশার করুণ নদীর মতো ক্ষীণ;  
ফেনসা ভাতের গন্ধে আম – মুকুলের গন্ধ মিশে যায় যেন বার – বার;

এই সব দেখেছিল রূপ যেই স্বপ্ন আনে – স্বপ্নে যেই রক্তাক্ততা আছে,  
শিখেছিল, সেই সব একদিন বাংলার চন্দ্রমালা রূপসীর কাছে;  
তারপর বেত বনে, জোনাকি ঝিল্লির পথে হিজল আমার অন্ধকারে  
ঘুরেছে সে সৌন্দর্যের নীল স্বপ্ন বুকে করে, –রুঢ় কোলাহলে গিয়ে তারে –  
ঘুমন – কন্যারে সেই – জাগাতে যায়নি আর – হয়তো সে কন্যার হৃদয়  
শঙ্খের মতন রক্ষ, অথবা পদ্মের মতো – ঘুম তবু ভাঙিবার নয়।



## আজ তারা কই সব ?

আজ তারা কই সব? ওখানে হিজল গাছ ছিল এক – পুকুরের জলে  
বহুদিন মুখ দেখে গেছে তার; তারপর কি যে তার মনে হল কবে  
কখন সে ঝরে গেল, কখন ফুরাল, আহা, – চলে গেল কবে যে নীরবে,  
তাও আর জানি নাকো; ঠোট ভাঙা দাঁড়কাক ঐ বেলগাছটির তলে  
রোজ ভোরে দেখা দিত – অন্য সব কাক আর শালিখের হুঁষ্ট কোলাহলে  
তারে আর দেখি নাকো – কতদিন দেখি নাই; সে আমার ছেলেবেলা হবে,  
জানালায় কাছে এক বোলতার চাক ছিল – হৃদয়ের গভীর উৎসবে  
খেলা করে গেছে তারা কত দিন – ফড়িঙ কীটের দিন যত দিন চলে

তাহারা নিকটে ছিলো – রোদের আনন্দে মেতে – অন্ধকারে শান্ত ঘুম খুঁজে  
বহুদিন কাছে ছিলো; – অনেক কুকুর আজ পথে ঘাটে নড়াচড়া করে  
তবুও আঁধারে ঢের মৃত কুকুরের মুখ – মৃত বিড়ালের ছায়া ভাসে;  
কোথায় গিয়েছে তারা? ওই দূর আকাশেল নীল লাল তারার ভিতরে  
অথবা মাটির বুকে মাটি হয়ে আছে শুধু – ঘাস হয়ে আছে শুধু ঘাসে?  
শুধালাম – উত্তর দিল না কেউ উদাসীন অসীম আকাশে।



## হৃদয়ে প্রেমের দিন

হৃদয়ে প্রেমের দিন কখন যে শেষ হয় – চিতা শুধু পড়ে থাকে তার,  
আমরা জানি না তাহা; – মনে হয় জীবনে যা আছে আজো তাই শালিধান  
রূপশালি ধান তাহা... রূপ, প্রেম... এই ভাবি... খোসার মতন নষ্ট ম্লান  
একদিন তাহাদের অসারতা ধরা পড়ে, – যখন সবুজ অন্ধকার,  
নরম রাত্রির দেশ নদীর জলের গন্ধ কোন এক নবীনাগতার  
মুখখানা নিয়ে আসে – মনে হয় কোনোদিন পৃথিবীতে প্রেমের আহ্বান  
এমন গভীর করে পেয়েছি কি? প্রেম যে নক্ষত্র আর নক্ষত্রের গান,  
প্রাণ যে ব্যাকুল রাত্রি প্রান্তরের গাঢ় নীল অমাবস্যায় –

চলে যায় আকাশের সেই দূর নক্ষত্রের লাল নীল শিখার সন্ধানে,  
প্রাণ যে আঁধার রাত্রি আমার এ, – আর তুমি স্বাতীর মতন  
রূপের বিচিত্র বাতি নিয়ে এলে, – তাই প্রেম ধুলায় কাঁটায় যেইখানে  
মৃত হয়ে পড়ে ছিল পৃথিবীর শূন্য পথে সে গভীর শিহরণ,  
তুমি সখী, ডুবে যাবে মুহূর্তেই রোমহর্ষে – অনিবার অরণ্যের ম্লানে  
জানি আমি; প্রেম যে তবুও প্রেম; স্বপ্ন নিয়ে বেঁচে রবে, বাঁচিতে সে জানে।



## কোনোদিন দেখিব না

কোনোদিন দেখিব না তারে আমি: হেমন্তে পাকিবে ধান, আষাঢ়ের রাতে  
কালো মেঘ নিঙড়ায়ে সবুজ বাঁশের বন গেয়ে যাবে উচ্ছ্বাসের গান  
সারারাত, – তবু আমি সাপচরা অন্ধ পথে – বেনুবনে তাহার সন্ধান  
পাবো নাকে: পুকুরের পাড়ে সে যে আসিবে না কোনোদিন হাঁসিনীর সাথে,  
সে কোনো জ্যোৎস্নায় আর আসিবে না – আসিবে না কখনো প্রভাতে,  
যখন দুপুরে রোদে অপরাজিতার মুখ হয়ে থাকে ম্লান,  
যখন মেঘের রঙে পথহারা দাঁড়কাক পেয়ে গেছে ঘরের সন্ধান,  
ধূসর সন্ধ্যায় সেই আসিবে না সে এখানে; – এইখানে ধুন্দুল লতাতে

জোনাকি আসিবে শুধু: ঝাঁঝিঁ শুধু; সারারাত কথা কবে ঘাসে আর ঘাসে  
বাদুড় উড়িবে শুধু পাখনা ভিজায়ে নিয়ে শান্ত হয়ে রাতের বাতাসে;  
প্রতিটি নক্ষত্র তার সন্ধান খুঁজে জেগে রবে প্রতিটির পাশে  
নীরব ধূসর কণা লেগে রবে তুচ্ছ অনূকণাটির শ্বাসে  
অন্ধকারে – তুমি, সখি চলে গেলে দূরে তবু; – হৃদয়ের গভীর বিশ্বাসে  
অশ্বখের শাখা ঐ দুলিতেছে; আলো আসে, ভোর হয়ে আসে।



## ঘাসের ভিতরে সেই

ঘাসের ভিতরে সেই চড়ায়ের শাদা ডিম ভেঙে আছে – আমি ভালোবাসি  
নিস্তরু করুণ মুখ তার এই – কবে যেন ভেঙেছিল – ঢের ধুলো খড়  
লেগে আছে বুকে তার – বহুক্ষণ চেয়ে থাকি; – তারপর ঘাসের ভিতর  
শাদা শাদা ধুলোগুলো পড়ে আছে, দেখা যায় খইধান দেখি একরাশি  
ছড়িয়ে রয়েছে চুপে; নরম বিষন্ন গন্ধ পুকুরের জল থেকে উঠিতেছে ভাসি;  
কান পেতে থাকি যদি, শোনা যায়, সরপুটি চিতলের উদ্ভাসিত স্বর  
মীনকন্যাদের মতো, সবুজ জলের ফাঁকে তাদের পাতালপুরী ঘর  
দেখা যায় – রহস্যের কুয়াশায় অপরূপ – রূপালি মাছের দেহ গভীর উদাসী

চলে যায় মন্ত্রিকুমারের মতো, কোটাল ছেলের মতো রাজার ছেলের মতো মিলে  
কোন এক আকাজ্জার উদঘাটনে কত দূরে; বহুক্ষণ চেয়ে থাকি একা  
অপরাহু এল বুঝি? – রাঙা রৌদ্রে মাছরাঙা উড়ে যায় – ডানা ঝিলমিলে;  
এক্ষুনি আসিবে সন্ধ্যা, – পৃথিবীতে ম্রিয়মাণ গোধূলি নামিলে  
নদীর নরম মুখ দেখা যাবে – মুখে তার দেহে তার কতো মৃদু রেখা  
তোমারি মুখের মতো: তবুও তোমার সাথে কোনোদিন হবে নাকো দেখা।



## এই সব ভালো লাগে

( এই সব ভালো লাগে) : জানালার ফাঁক দিয়ে ভোরের সোনালি রোদ এসে  
আমারে ঘুমাতে দেখে বিছানায়, —আমার কাতর চোখ, আমার বিমর্ষ ম্লান চুল —  
এই নিয়ে খেলা করে: জানে সে যে বহুদিন আগে আমি করেছি কি ভুল  
পৃথিবীর সবচেয়ে ক্ষমাহীন গাঢ় এক রূপসীর মুখ ভালোবেসে,  
পউষের শেষ রাতে আজো আমি দেখি চেয়ে আবার সে আমাদের দেশে  
ফিরে এল; রং তার কেমন তা জানে অই টসটসে ভিজে জামরুল,  
নরম জামের মতো চুল তার, ঘুঘুর বুকুর মতো অস্ফুট আঙুল; -  
পউষের শেষ রাতে নিমপেঁচাটির সাথে সে যে ভেসে আসে

কবেকার মৃত কাক: পৃথিবীর পথে আজ নাই সে তো আর;  
তবুও সে ম্লান জানালার পাশে উড়ে আসে নীরব সোহাগে  
মলিন পাখনা তার খড়ের চালের হিম শিশিরে মাখায়;  
তখন এ পৃথিবীতে কোনো পাখি জেগে এসে বসেনি শাখায়;  
পৃথিবীও নাই আর; দাঁড়কাক একা — একা সারারাত জাগে;  
‘কি বা হয়, আসে যায়, তারে যদি কোনোদিন না পাই আবার।’



## সন্ধ্যা হয় - চারিদিকে

সন্ধ্যা হয় - চারিদিকে মৃদু নীরবতা  
কুটা মুখে নিয়ে এক শালিখ যেতেছে উড়ে চুপে;  
গোরুর গাড়িটি যায় মেঠো পথ বেড়ে ধীরে ধীরে;  
আঙিনা ভরিয়া আছে সোনালি খড়ের ঘন স্তূপে;

পৃথিবীর সব ঘুঘু ডাকিতেছে হিজলের বনে;  
পৃথিবীর সব রূপ লেগে আছে ঘাসে;  
পৃথিবীর সব প্রেম আমাদের দু; জনার মনে;  
আকাশ ছড়ায় আছে শান্তি হয়ে আকাশে আকাশে।



## একদিন কুয়াশার

একদিন কুয়াশার এই মাঠে আমারে পাবে না কেউ খুঁজে আর, জানি;  
হৃদয়ের পথ চলা শেষ হল সেই দিন – গিয়েছে যে শান্ত – হিম ঘরে,  
অথবা সান্ত্বনা পেতে দেরি হবে কিছু কাল – পৃথিবীর এই মাঠখানি  
ভুলিতে বিলম্ব হবে কিছু দিন, এ মাঠের কয়েকটি শালিকের তরে  
আশ্চর্য আর বিস্ময়ে আমি চেয়ে রবো কিছু কাল অন্ধকার বিছানার কোলে,  
আর সে সোনালি চিল ডানা মেলে দূর থেকে আজো কি মাঠের কুয়াশায়  
ভেসে আসে? সেই ন্যাড়া অশ্বথের পানে আজো চলে যায়

সন্ধ্যা সোনার মতো হলে

ধানের নরম শিষে মেঠো হুঁদুরের চোখ নক্ষত্রের দিকে আজো চায়?

সন্ধ্যা হলে? মউমাছি চাক আজো বাঁধে না কি জামের নিবিড় ঘন ডালে,

মউ খাওয়া হয়ে গেলে আজো তারা উড়ে যায় কুয়াশায় সন্ধ্যার বাতাসে –

কতো দূরে যায়, আহা... অথবা হয়তো কেউ চলতার ঝরাপাতা জ্বালে

মধুর চাকের নিচে – মাছিগুলো উড়ে যায়... ঝরে পড়ে... ম'রে থাকে ঘাসে –



## ভেবে ভেবে ব্যথা পাব

ভেবে ভেবে ব্যথা পাব: মনে হবে, পৃথিবীর পথে যদি থাকিতাম বেঁচে  
দেখিতাম সেই লক্ষ্মীপেঁচাটির মুখ যারে কোনোদিন ভালো করে দেখি নাই আমি  
এমনি লাজুক পাখি, - ধূসর ডানা কি তার কুয়াশার ঢেউয়ে ওঠে নেচে;  
যখন সাতটি তারা ফুটে ওঠে অন্ধকারে গাবের নিবিড় বুকে আসে সে কি নামি?  
শিউলির বাবলার আঁধার গলির ফাঁকে জোনাকির কুহকের আলো  
করে না কি? ঝাঁঝের সবুজ মাংসে ছোটো - ছোটো ছেলেমেয়ে বউদের প্রাণ  
ভুলে যায়; অন্ধকার খুঁজে তারে আকন্দবনের ভিড়ে কোথায় হারালো

মাকাল লতার তলে শিশিরের নীল জলে কেউ তার জানে না সন্ধান।  
আর সেই সোনালি চিলের ডানা - ডানা তার আজো কি মাঠের কুয়াশায়  
ভেসে আসে; - সেই ন্যাড়া অশ্বখের পানে আজও চ'লে যায়  
সন্ধ্যা সোনার মত হলে?  
ধানের নরম শিষে মেঠো হুঁদুরের চোখ নক্ষত্রের দিকে আজো চায়?  
আশ্চর্য বিস্ময়ে আমি চেয়ে রবো কিছু কাল অন্ধকার বিছানার কোলে।



সংগ্রহ ও সম্পাদনা

নাবিউল আফরোজ

[RNABIUL@GMAIL.COM](mailto:RNABIUL@GMAIL.COM)

[HTTP://SONNET91.BLOGSPOT.COM](http://SONNET91.BLOGSPOT.COM)

অলংকরণ ও প্রচ্ছদ

সোহেল কাজী

[SOHELL.KAZI@GMAIL.COM](mailto:SOHELL.KAZI@GMAIL.COM)

[HTTP://KAZISOHEL.BLOGSPOT.COM](http://KAZISOHEL.BLOGSPOT.COM)